

乾隆杭州府志

杭州府志卷七十四

名宦

宋人州郡之志有宦蹟錄以存遺愛與列傳之具顯末者異矣會稽太守之賢者著於漢書當其時固統轄之官也會城爲總治之地民間習見夫上官之導揚德意聽覩較近沾被尤親其謳思亦愈久舊志載臺司政績遞及守土之官蓋有由矣茲仍其舊文以時代爲叙

漢

嚴助會稽吳人武帝時爲中大夫建元三年閩越舉兵圍東甌遣助以節發兵會稽後閩越降漢令助諭意風指于

南越還侍燕從容帝問所欲拜爲會稽太守

漢書本傳

朱買臣字翁子吳人邑子嚴助薦拜爲中大夫是時東越數反覆買臣言可破滅上拜買臣會稽太守謂曰富貴不歸故鄉如衣繡夜行今子何如買臣頓首謝詔買臣到郡治樓船備糧食水戰具須詔書到軍興俱進居歲餘買臣受詔將兵與橫海將軍韓說等擊東越有功

漢書本傳

按省志名宦門於三國前僅載陳渾一人萬歷志亦列秦殷通漢嚴助朱買臣于雜傳馬氏舊志則列助買臣而不載通考助買臣俱以文學結主知出吳鄉郡兼立武功與通之附名於史記者不同故仍之至會稽通轄

杭郡詳前建置卷中

任延字長孫南陽宛人年十二顯名太學號爲聖童避兵  
隴西隗囂遣使請延不應更始元年以延爲大司馬屬拜  
會稽都尉時年十九迎官驚其壯及到靜泊無爲惟先遣  
饋禮祠延陵季子時天下新定避亂江南者皆未還中土  
會稽頗稱多士延到皆聘請高行如董子儀嚴子陵等敬  
待以師友之禮掾吏貧者輒分俸祿以賑給之省諸卒令  
耕公田以周窮急每時行縣輒使慰勉孝子就餐飯之

漢書

本傳

按漢舊制郡守主治民尉典武事所職不同後則有以

都尉行太守事者延所行政皆太守事而遣祠延陵則尤西部事當列于杭嘉諸郡者也省志未載今從舊府志增錄

第五倫字伯魚京兆長陵人光武時拜會稽太守雖爲二千石躬自斬芻養馬妻執炊爨受俸裁留一月糧餘皆賤買與民之貧羸者會稽俗多淫祀好卜筮常以牛祭神財產困之困置倫移書屬縣曉告百姓巫祝有依托鬼神詐怖愚民皆案論之有妄屠牛者吏輒行罰百姓以安

漢書本傳

尹興明帝時爲會稽太守歲荒民饑興使戶曹陸續于都

亭賦民餽粥

舊志

慶鴻洛陽人與廉范爲刎頸交時人稱曰前有管鮑後有  
慶廉鴻慷慨有義節位會稽郡太守有異迹

漢書廉  
范傳

張霸字伯饒成都人永元中爲會稽太守表用郡處士顧  
奉公孫松等奉後爲潁川太守松爲司隸校尉並有時名  
其餘有業行者皆見擢用郡中爭勵志節習經者以千數  
道路但聞誦聲

漢書  
本傳

馬稜茂陵人字伯威援之族孫也少孤依從兄毅馬氏廢  
肅宗以稜行義徵拜謁者爲會稽太守治有聲

漢書馬  
援傳

彭修字子陽毗陵人仕郡爲功曹時西部都尉宰鼂行太  
守事以微過收吳縣獄吏將殺之主簿鍾離意爭諫甚切

鼂怒使收縛意欲案之掾史莫敢諫修排閤直入拜于庭  
曰明府發雷霆于主簿請聞其過鼂曰受教三日初不奉  
行廢命不忠豈非過耶修曰昔任座面折文侯朱雲攀毀  
闕檻自非賢君焉得忠臣今慶明府爲賢君主簿爲忠臣  
鼂遂原意罰貰獄吏罪後州辟從事時賊張子林等數百  
人作亂郡言州請修守吳令修與太守俱出討賊賊望見  
車馬競交射之飛矢雨集修障扞太守爲流矢所中死太  
守得全賊素聞其恩信卽殺弩中修者餘悉降散言曰自  
爲彭君故降不爲太守服也

後漢書  
本傳

按名宦以時代爲次同時人則官階爲次下並倣此

王充字仲任上虞人明帝時仕郡爲功曹以數諫爭不合去閉戶潛思著論衡八十五篇刺史董勤辟爲從事轉治

中後漢書

本傳

戴就字景成上虞人仕郡倉曹掾揚州刺史歐陽參奏太守成公浮臧罪遣部從事薛安案倉庫簿領收就于錢塘縣獄幽囚考掠就慷慨直辭色不變容言太守剖符大臣當以死報國卿雖銜命固當申斷寃毒奈何誣枉忠良強相掠理安深奇其壯節卽解械更與美談表其言辭解釋郡事徵浮還京師免歸鄉里太守劉寵舉就孝廉光祿主

事病卒

後漢書本傳



鍾離意字子阿山陰人少爲郡督郵時部縣亭長有受人酒禮者府下記案考之意封還記入言于太守曰政化之本由近及遠今宜先清府內且闕畧遠縣細微之愆太守甚賢之任以縣事建武十四年會稽大疫死萬數意親給醫藥所部多蒙全濟

後漢書本傳

謝夷吾字堯卿山陰人少爲郡吏學風角占候太守第五倫擢爲督郵

後漢書本傳

轉署主簿倫甚崇其道德使子從受

春秋夷吾待之如師弟子之禮時或遊戲不肯讀書便白

倫行罰遂成其業

謝承後漢書

鄭宏字巨君山陰人少爲鄉嗇夫太守第五倫行春見而

奇之召署督郵舉孝廉元和中爲太尉

後漢書本傳

陳渾嘉平元年爲餘杭令縣有茗溪自天目發源洪潦歲一再至勢甚奔湧溪小不能容則泛濫橫溢漂沒田廬邑被其災且及鄰縣渾至度地形于渡南闢上下兩湖卽湖之西北鑿石門導溪流入湖以分殺其勢又延袤築湖塘三十餘里俾水暫有所蓄然後安徐出滾壩不至怒馳乃于沿溪一帶增置陡門塘堰數十餘處俾蓄洩以時旱澇無患民至今利賴之初邑城在溪南渾請于朝廷遂改置于溪北衛民固圉屹然爲杭郡西陲重地焉

舊志

三國吳

朱治字君理故鄣人隨孫堅征伐堅薨遷吳郡都尉從錢塘欲進到吳吳郡太守許貢拒之于由拳治與戰大破之遂入郡領太守事黃武元年封毘陵侯領郡如故二年徙封故鄣歲餘還吳

吳志本傳

芮祉字宣嗣丹陽人從孫堅征伐有功堅薦爲九江太守

轉吳郡所在有聲

吳書見潘濬傳註

滕引字承嗣北海劇人少有節操美儀容弱冠尚公主年三十起家爲丹陽太守徙吳郡所在見稱引上表陳時宜及民間優劣多所匡弼權以引故增重公主之賜屢加存問引每聽辭訟斷罪法察言觀色務盡情理人有窮冤悲

苦之言對之流涕

吳志本傳

賀邵字興伯山陰人景帝休卽位爲吳郡太守初不出門  
吳中諸強族輕之乃題府門云會稽鷄不能啼邵聞故出  
行至門反索筆足之曰不可啼殺吳見于是至諸屯邸檢  
校諸顧陸役使官兵及藏逋亡悉以事言上罪者甚衆陸

抗時爲江陵都督故下請孫皓然後得釋

世說新語

虞翻字仲翔餘姚人太守王朗命爲功曹後歸孫策復爲  
功曹待以交友之禮出爲富春長策薨諸長史並欲赴喪  
翻曰恐鄰縣山民或有奸變遠委城郭必致不虞因留制  
服行喪諸縣效之咸以安寧

吳志本傳

陸遜字伯言吳郡吳人本名議年二十一始仕幕府歷東  
西曹令史出爲海昌屯田都尉並領縣事縣連年亢旱遜  
開倉穀以賑貧民勸督農桑百姓蒙賴時會稽山賊潘臨  
歷年不禽遜召兵討治所向皆服拜定威校尉權以兄策  
女配遜數訪世務會稽太守淳于式表遜在取民人愁擾  
所在遜後詣都言次稱式佳吏權曰式白君而君薦之何  
也遜對曰式意欲養民是以白遜若遜復毀式以亂聖聽  
不可長也權曰此誠長者之事顧人不能爲耳

吳志  
本傳

晉

謝琰字爰度陽夏人太保安之子蚤以貞幹稱孫恩之亂

琰以衛將軍加督吳興義興軍事斬賊黨許允之于義興  
攻邱厓于吳興破之奉詔與劉牢之合力討恩牢之濟浙  
江琰遣司馬高素爲助恩逃于海朝廷憂之以琰爲會稽  
內史都督五郡軍事如故賊至山陰北三十餘里琰尚未  
食奮曰當滅此朝食跨馬而出與將軍桓寶摧鋒陷陣殺  
賊甚多而塘路進狹賊于艦中傍射前後斷絕琰與子肇  
竣俱遇害詔琰父子隕于君親忠孝萃于一門贈侍中諡

忠肅

舊志

王舒字處明瑯琊臨沂人丞相導之從弟成帝時受撫軍  
將軍會稽內史在郡二年而蘇峻作逆假節都督行揚州

刺史事庾冰奔舒舒率衆俱渡浙江顧衆顧颺等起義軍以應舒吳興太守虞潭率所領屯烏菴亭不敢進舒遣子允之以精銳三千邀賊于武康破之時臨海新安諸山縣並應賊舒分兵討之陶侃立行臺上舒監浙江東五郡軍事賊平以功封彭澤縣侯

晉書本傳

顧衆字長始吳郡吳人成帝時爲義興太守蘇峻反衆還吳潛圖義舉時吳國內史庾冰奔于會稽峻以蔡謨代之前陵江將軍張慙爲峻收兵于吳衆遣人諭慙慙從之衆遣郎中徐機告謨謨檄衆爲本國督護會稽內史王舒吳興內史虞潭並檄衆爲五郡大督護統諸義軍潭遣將姚

休爲衆前鋒與賊戰沒衆還守柴壁時賊黨方銳人咸勸衆過浙江衆曰不然今保固柴壁可得全錢唐以南五縣若越他境便爲寓軍控引無所非長計也臨平人范明亦謂衆曰此地險要可以制寇不可委也衆乃版明爲叅軍復進討賊峻平論功封鄱陽縣伯卒贈光祿大夫諡曰靖

晉書  
本傳

周玘字宣佩陽羨人元帝時三定江南開復王畧帝嘉其勲以玘行建威將軍吳興太守封烏程縣侯吳興寇亂之後百姓饑饉盜賊公行玘甚威惠百姓敬愛之期年之間

境內寧謐

晉書周  
處傳



應詹字思遠南頓人元帝雅重其才出補吳國內史以公

事免

晉書  
本傳

鄧攸字伯道平陽襄陵人元帝以攸爲太子中庶子時吳郡闕守人多欲之帝以授攸攸載米之郡俸祿無所受惟飲吳水而已時郡中大饑攸表賑貸未報乃輒開倉救之臺遣散騎常侍桓彝虞駿慰勞饑人觀聽善不乃劾攸以擅出穀俄而有詔原之攸在郡刑政清明百姓歡悅爲中興良守後稱疾去職郡常有送迎錢數百萬攸去郡不受一錢百姓數千人留牽攸船不得進攸乃小停夜中發去吳人歌之曰統如打五鼓鷄鳴天欲曙鄧侯挽不留謝令

推不去百姓詣臺乞留一歲不聽拜侍中

晉書本傳

張茂字偉康會稽人少單貧有志行爲鄉里所敬信元帝辟茂爲掾屬遷太子右衛率出補吳國內史沈充反茂與

二子並遇害贈太僕

晉書本傳

虞潭字思奧餘姚人咸和初爲吳興太守蘇峻賊帥張健據吳城潭檄吳郡顧衆等統義軍討健大破之咸康初轉鎮軍將軍吳國內史時軍荒之後百姓饑饉死亡塗地潭乃表出倉米賑救又修滬瀆壘以防海潮百姓賴之

晉書本傳

陶回丹陽人司徒王導以回有器幹擢補北軍中候俄轉中護軍遷吳興太守歲饑穀貴三吳尤甚詔欲聽相鬻賣

以拯一時之急回上疏曰當今天下不遍荒歉惟獨東土  
穀價偏貴便相鬻賣聲必遠流北賊聞此將窺疆場臣意  
不如開倉廩以賑之乃不待報輒便開倉及割府郡軍資  
數萬斛米以救乏絕由是一境獲全既而下詔并敕會稽

吳郡依回賑恤二郡賴之

晉書本傳

蔡謨字道明陳留考城人也蘇峻搆逆吳國內史庾冰出  
奔會稽乃以謨爲吳國內史謨至與張闓顧衆顧颺等起  
義兵迎冰還郡峻平復爲侍中

晉書本傳

孔坦字君平愉從子咸和中爲吳興內史歲饑運家米以

賑窮乏百姓賴之

晉書孔愉傳

陸納字祖言吳人少清操絕俗舉秀才累遷爲吳興太守  
至郡不受俸祿頃之召拜左民尚書外白宜裝幾船納曰  
私奴裝糧食來無所復需也臨發止有襪被而已其餘並

封以還官

晉書陸士光傳

庾羲亮之次子少有時譽初爲吳國內史時穆帝頗愛文  
義羲至郡獻詩頗存諷諫因上表曰陛下以聖明之德方  
隆唐虞之化而事役殷曠百姓凋殘以數州之資經贍四  
海之務其爲勞敝豈可具言昔漢文居隆盛之世躬自儉  
約斷獄四百殆至刑措賈誼嘆息猶有厝人積薪之言以  
古况今所以益其憂懼臣受恩奕世思盡絲髮受任到東

親臨所見敢緣宏政獻其丹愚其詩文多不載方見授用

而卒

晉書庾亮傳

王洽字敬和丞相導第三子于諸子中最知名歷建武將

軍吳國內史徵拜領軍

晉書本傳

江灌字道羣園人爲吳郡太守性方正視權貴蔑如也

晉書

江適傳

孔嚴字彭祖山陰人故吳興守愉之從子領尚書時東海王奕求海鹽錢唐以水牛牽埭稅取錢帝從之嚴諫乃止太和中拜吳興太守加秩中二千石善于宰牧甚得人和餘杭婦人年荒賣子以活夫之兄子武康兄弟二人妻各

有孕弟遠行遇荒歲不能兩全乃棄其子而活弟子嚴並  
褒薦之又甄賞才能之士論者美焉

晉書  
本傳

謝安字安石陽夏人簡文帝時爲吳興太守在官無當時

譽去後爲人所思

晉書  
本傳

王薈字敬文導之子少歷清宦除吏部郎侍中吳國內史

時年饑人多餓死薈以私米作粥所濟活甚衆

晉書王  
導傳

朱序字次倫義陽人太和中爲兖州刺史時長城民錢宏

聚黨百餘人藏匿原鄉山以序爲中軍司馬吳興太守至

郡討平之事訖還兖州

晉書  
本傳

王珣字元琳導之孫繇侍中爲吳國內史在郡爲士庶所

悅徵爲尚書太僕射

晉書王導傳

謝邈字茂度安之族孫爲吳興太守孫恩之亂爲賊所執逼令北面邈厲聲曰我不得罪天子何北面之有遂遇害

晉書謝

安傳

王蘊字叔仁孝武定皇后之父補吳興太守甚有德政屬郡荒輒開倉賑贍主簿執諫請先列表上待報蘊曰今百姓嗷然路有饑饉若表上須報何以救將死之命乎專輒之愆罪在太守且行仁義而敗無所恨也于是大賑貸之朝廷免蘊官士庶詣闕訴之特令降晉陵太守復有惠化

百姓歌之

晉書本傳

譙敬王恬字元愉忠正有幹局孝武時領左衛將軍補吳

國內史又領太子詹事

晉書本傳

袁崧夏陽人少有才名歷顯位爲吳興太守孫恩作亂崧

守滬瀆城城陷被害

晉書袁瓌傳

魏詠之字長道任城人家貧好學不倦桓元篡位協贊義

謀義熙初進征虜將軍吳國內史尋轉荊州刺史

晉書本傳

范甯字武子少篤學多所通覽爲餘杭令在縣興學校養

生徒潔已修禮期年之後風化大行自中興以來從學敦

教未有如甯者也在職六年

晉書本傳

范宏之字長文安北將軍汪之孫晉孝武朝爲博士以論



桓温不臣爲温故吏王珣所惡黜令餘杭

萬歷舊志

南北朝

吳喜吳興臨安人出身爲領軍府白衣吏被薦世祖以喜爲主書見親遇歷官河東太守殿中御史太宗卽位四方反叛卽假建武將軍督羽林兵東討性素寬厚所至人咸懷之百姓聞吳河東來望風解散大破賊于錢唐之定山

事平封竟陵縣侯

舊志

江夷字茂遠考城人景平二年由吏部尚書出爲吳郡太守營陽王于吳縣見害夷臨哭盡禮又以兄疾去官美風儀善舉止歷仕以和簡稱

宋史本傳

富陽縣賊孫法亮作亂政

永興會稽太守褚淡之遣隊主陳願等破賊夷輕行之職  
停吳一宿進至富陽分別善惡執送願徙賊餘黨數百家  
于彭城諸處

宋書褚叔度傳

按江夷宋時爲吳郡太守非吳興太守也舊志皆作吳

興誤

王韶之字休泰臨沂人少帝卽位遷侍中出爲吳郡太守

在郡夙夜勤勵政績甚美文帝嘉之稱爲良守

南史本傳

謝述字景先陽夏人太祖時爲吳興太守在郡清省爲吏

民所懷

宋書謝景仁傳

羊元保太山南城人元嘉初爲吳郡太守加秩中二千石

太祖以元保素廉寡欲故頻受名郡爲郡雖無幹績而去

後常見思不營財利處家儉薄

宋書本傳

何叔度廬江潯人也爲金紫光祿大夫吳郡太守加秩中

二千石太保王宏每稱其清身潔已

宋書何尚之傳

袁湛字士深陳郡陽夏人高祖時以從征功封晉寧縣五等男出爲吳興太守蒞政和理爲吏民所稱太祖卽位贈

侍中左光祿大夫開府儀同三司諡曰敬公

宋書本傳

孔靖字季恭山陰人愉之孫義熙間爲吳興太守加冠軍

先是吳興頻喪太守云項羽神爲卞山王居郡廳事二千

石至嘗避之季恭居廳事竟無害也

宋書本傳

劉損字子騫元嘉中爲吳郡太守至閩門便入太伯廟愴然曰清塵尚可彷彿衡宇一何摧隤卽令修葺

南史劉粹傳

顧覲之字偉仁吳人大明初爲吳郡太守八年復爲吏部尚書加給事中未拜復爲吳郡太守泰始初又以爲左將軍吳郡太守子綽財甚豐鄉里士庶多負其責覲之每禁之不從及爲吳郡誘綽曰民間與汝交關有幾許不盡爲汝督之綽喜出諸券與覲之覲之悉焚燒宣語負三郎責皆不須還券燒之矣嘗言秉命有定非智力所移妄求僥

倖徒虧雅道云

宋書本傳

王延之瑯琊臨沂人當宋明帝時爲吳郡太守罷郡歸家

產無所增益後爲吏部尚書復出爲吳興太守

齊書本傳

沈文季字伯達武康人元徽初爲吳興太守飲酒竟日而事不廢昇明元年沈攸之反文季爲冠軍將軍督吳興錢唐軍事收殺攸之弟新安太守登之誅其宗族加持節進號征虜將軍齊永明初爲吳郡太守進平東將軍遷會稽太守富陽人唐寓之作亂文季遣器仗將吏救援錢唐又發吳中民丁救之蓋于勘定杭土有裨助云

齊書本傳

按舊志沈文季作字仲遠征虜將軍作征東將軍唐寓之作錢唐民今據本傳訂正

張岱字景山吳人宋泰始末爲吳興太守後遷吏部尚書

建元元年復出爲左將軍吳郡太守帝知岱歷任清直至郡未幾卽敕岱曰大邦任重乃未回換但總戎務殷宜須望實今用卿爲護軍加給事中岱拜竟詔以家爲府陳疾明年加金紫光祿大夫世祖卽位復以岱爲吳興秩中二千石晚節在吳更以寬恕著名

齊書本傳

安陸昭王綏字景業建元元年爲吳郡太守政有能名武

帝嘉之

南史本傳

張瓌字祖逸吳興吳人昇明初以取劉暹功授吳郡太守封義成侯以旣封侯有國秩不取郡俸帝敕上庫別藏俸

以表其清

南史張裕傳

蕭順之字文偉梁武帝父建元中歷黃門郎安西長史吳郡內史所在著名吳郡張緒常稱文武兼資有德有行吾

敬蕭順之

南史梁高祖紀

張稷字公喬吳郡人武帝時爲散騎常侍將軍吳興太守下車存問遺老引其子孫置之右職政稱寬恕進號雲麾將軍召爲左僕射道由吳鄉候稷者滿水陸稷單裝竟還

京師人莫之識

梁書本傳

按南史梁書皆載張稷字公喬舊志作士喬誤今訂正徐孝嗣字始昌東海鄉人世祖時爲吳興太守尚書令王儉贈四言詩曰方軌叔茂追清彥輔柔亦不如剛亦不吐

在郡有能名

齊書本傳

謝淪字義潔陽夏人世祖時遷司徒左長史出爲吳興太

守在郡稱美績

齊書本傳

孔琇之山陰人爲臨海太守罷郡還獻乾薑三十斤世祖嫌少及知琇之清乃嘆息出監吳興尋拜太守治稱清嚴

齊書本傳

王思遠瑯琊臨沂人永明中邵陵王子貞爲吳郡除思遠

吳郡丞以本官行郡事論者以爲得人

南史本傳

王瑩字奉光齊明帝時任吳興郡有能名

南史本傳

袁昂字千里陽夏人永元末爲吳興太守梁高祖師至京



師州郡望風降款昂獨拒郡不受命

梁書本傳

蔡搏字景節考城人爲吳興太守天監元年宣城郡吏吳承伯聚衆寇吳興掩襲郡城吏民請搏避之搏堅守不動募勇敢拒戰斬承伯餘黨悉平加信武將軍召爲度支尚

書

梁書本傳

柳暉字文暢河東解人天監二年爲吳興太守六年召爲散騎常侍八年復爲吳興太守六年爲政清靜民吏懷之

陳疾解任父老千餘人拜表陳請

梁書本傳

蕭正仁梁時爲吳興太守有治能

萬歷舊志

蕭琛字彥瑜蘭陵人天監九年遷吳興太守郡有項羽廟

士人名爲慎王甚有靈驗于郡廳事爲神座公私請禱前  
後二千石皆于廳拜祠而避居他室琛至徙神還廟而處  
之不疑又禁殺牛解祀以脯代肉琛頻泣大郡不治產業

梁書

本傳

張充字延符吳郡人天監中除雲麾將軍吳郡太守下車

卹貧老故舊莫不欣悅

梁書  
本傳

謝覽字景滌陽夏人天監十二年出爲吳興太守中書舍  
人黃睦之家居烏程子弟專橫前太守皆折節事之覽初  
到郡睦之子弟來迎覽遂去其船杖吏爲通者自是睦之  
家杜門不出郡多盜爲東道患覽下車肅然一境寧謐初

齊明帝及覽父淪東海徐孝嗣並爲吳興名守覽皆欲過之昔在新安頗聚斂至是遂稱廉潔時人方之王懷祖云

梁書謝

肅傳

江革字休映考城人高祖時除都官尚書尋監吳郡時境內荒儉刼盜公行革至郡唯有公給仗身二十人百姓皆

懼不能靜寇革復省游軍尉百姓逾恐革乃廣施恩撫明

行制令盜賊靜息民吏安之

梁書本傳

夏侯亶字世龍天監十七年爲吳興太守在郡有惠政吏

民圖其像立碑頌美焉

梁書本傳

何敬容字國禮潯人侍中昌寓之子也尚齊長城公主普

通四年以吏部尚書出爲招遠將軍吳郡太守勤恤民隱  
辨訟如神視事四年治爲天下第一吏民詣闕植碑詔許  
之

梁書  
本傳

王規字威明臨沂人中大通二年爲吳郡太守主書芮宗  
珍家在吳前守者皆傾意附之至是珍宗假還規遇之甚  
薄珍宗還都密奏規不理政事俄爲左民尚書吏民千餘  
人詣闕請留表三奏不許求于郡樹碑許之

南史  
本傳

張纘字伯緒方城人大通間爲吳興太守省煩苛務清靜

民利便之

梁書張  
纘傳

謝舉字言揚陽夏人覽之弟也大同三年爲雲麾將軍吳

郡太守先是何敬容居郡有美績及舉爲政聲績畧相比

梁書

本傳

袁君正字世忠昂之子也歷吳郡太守當官蒞事有名稱

南史

本傳

張嶮字四山稷之子大同元年遷吳興太守侯景亂圍京城嶮遣弟伊率郡兵赴援京城陷中丞沈浚東歸勸嶮舉義于是收集士卒築繕城壘賊行臺劉神茂遣使說嶮命斬其使仍遣軍逆擊之破神茂景遣軍助神茂衆軍士崩嶮乃釋戎服坐廳事臨之以刃不屈景刑之都市賊平世

祖諡曰忠貞子

梁書本傳

周敏梁時爲吳興太守大開學校勸民種桑與麥百姓賴

之除國子博士

萬曆舊志

陳昌字敬業高祖第六子爲吳興太守時年十六容貌偉麗情神明秀雅性聰辯明習政事高祖遣謝哲蔡景歷輔昌爲郡又遣杜之偉授經昌一覽便誦明于義理剖析如

流

陳書本傳

沈君理字仲倫吳興人美風儀博涉經史有識鑒梁末陳高祖命監吳郡高祖受禪爲吳郡太守時兵革未寧百姓荒敝軍國乏用咸資東境君理招集士卒修治器械民下

悅附以幹理見稱

陳書本傳

按陳書南史皆載沈君理字仲倫舊志俱稱仲綸誤今

訂正

沈恪字子恭武康人梁太平元年監吳興郡入朝高祖受  
禪引恪令勒兵入辭因衛敬帝如別宮恪乃排闥入見叩  
頭謝曰恪身經事蕭家來今日不忍見許事分受死耳高

祖嘉其意以王僧志代之踐祚除吳興太守

陳書本傳

蕭濟字孝康東海蘭陵人少好學博通經史解褐梁秘書  
郎世祖卽位授侍中歷守臨安等郡所在皆著聲績太建

初入爲禮部尚書加給事中

陳書本傳

按通考通志及咸淳成化諸志南宋以前杭地俱無臨

安郡至於郡屬之臨安縣前漢爲餘杭縣地東漢分置  
臨水縣至晉改臨安縣漢書王子侯表有臨安侯其國  
上接東萊之昌陽下連東萊之徐鄉地理志瑯琊郡有  
臨安縣註云侯國地當東海東萊之間則陳書所載臨  
安郡未審何地茲依省志錄之俟攷

陳伯恭字肅之世祖第六子封晉安王天嘉六年爲平東  
將軍吳郡太守置佐史時年十餘歲留心政事官曹治理

陳書  
本傳

沈演之字臺卿武康人元嘉初舉秀才令錢唐有政績十  
二年東諸郡大水民人饑饉錢唐升米三百以演之及尚



書祠部郎江邃並兼散騎常侍巡行拯卹許以便宜從事  
演之乃開倉廩以賑饑民民有生子者口賜米一斗刑獄  
有疑枉悉散遣之百姓蒙賴轉別駕從事史性好舉才申  
滯而謙約自居推爲長者

錢塘縣志

劉道真爲錢塘令元嘉十三年東土饑上遣揚州治中沈  
演之巡行在所演之表薦道真政績爲治民之良宰帝嘉

之賜穀千斛

冊府元龜

張祐高平人歷臨安武康錢塘令並著能名宋世言長吏

者以祐爲首

宋書王敬之傳

蕭赤斧南蘭陵人宋大明初攻城有勲封永安亭侯除晉

熙王撫軍中兵叅軍出爲錢塘令治政爲百姓所安吏民

詰留之時議見許

南齊書本傳

庾炳之字仲文鄆陵人以尚書度支郎出補錢塘令治民

有績

宋書本傳

諸葛闡之元嘉中爲富陽令上議請禁夏至五絲命縷蓋

邑令之勇于事事者

萬曆舊志

劉道錫元嘉間令餘杭與錢塘縣劉真道咸用治最爲使

者沈演之所薦同賞穀千石而演之疏中尤稱道錫能率

先吏民築塘捍水著異績云

萬曆舊志

孫謙字長遜東莞莒人齊初爲錢唐令御煩以簡獄無繫

囚及去官百姓以謙在職不受餉遺追載縑帛以送之謙辭不受每去官輒無私宅借空車廐居焉謙自少及老歷二縣五郡所在廉潔居身儉素牀施籬條屏風冬則布被莞席夏日無幃帳而夜臥未嘗有蚊蚋人多異之

南史本傳

王籍字文海臨沂人仕齊爲餘杭令政化如神善于槌伏自下莫能欺又爲錢塘縣下車布政咸謂數十年來未之

有也

南史本傳

按王籍萬曆志作陶籍且云宏景之子省志據南史改正且宏景終身不娶無子彰著史傳萬曆志誤甚又梁

書王籍傳作歷餘姚錢唐令姚字當係杭字之誤

何洵永明三年任富陽令定寇亂集散亡邑以治稱

富陽縣志

張眉張瓌子也以謹重稱出監富陽令廓然獨處無所用

心死之日家無遺財惟書千餘卷

南史本傳

丁遵天監初爲臨安令性恬淡薄于名利嘗于餘杭建橋

以濟不通邑人德之

成化舊志

張機天資聰俊爲士林館學士侯景亂圍城猶侍哀太子

于武德後殿臺城陷崎嶇避難不事景景平歷臨安令高

祖受禪除太常寺丞

臨安縣志

邱師施吳興人梁時爲臨安縣以廉潔稱

南史范述曾傳

王沈字彥流東海人歷錢塘山陰秣陵令南平長沙太守

清廉戒慎身恒居祿而居處日貧死之日無宅可憇故吏

爲營棺柩

南史傳  
琰傳

錢道戢字子韜少以孝行著聞爲餘杭令多惠政

餘杭  
縣志

劉允恭陳時餘杭令治事詳明泄下清簡囹圄屢空田野

開闢百姓爲立德政碑

萬一  
舊志

唐

按舊志載歷朝總轄甚多今覈駐劄之地與杭州無涉者槩從刪簡或杭州雖在所轄之內而政績見于別府者亦不載

韓滉字太冲京兆長安人六歷十二年拜浙江東西都團

練觀察使尋加鎮海軍節度使澠安輯百姓均其租稅未  
及踰年境內稱理涇師之亂澠以兵三千人臨金山江南  
兩浙轉輸粟帛府無虛月朝廷賴焉

舊唐書  
本傳

韓臯字仲聞澠之子資質重厚有大臣器貞元中爲杭州

刺史入拜尚書右丞

舊志

杜審權字殷衡第進士辟浙西幕府宣宗時以門下侍郎  
出爲鎮海節度使同平章事隴助亂徐州審權與令狐綯  
崔鉉連師犄角饋粟相銜王師賴濟助破進檢校司空審  
權清重寡言性長厚在方鎮視事有常處要非日入未始  
就內寢坐必歛衽嘗若對大賓客或晝日少息則顧直將

解簾卽旁無人自起徹鈎簾徐下乃退

唐書本傳

裴瓌絳州聞喜人乾符四年爲浙江鎮海節度使值浙西  
狼山鎮遏使王郢作亂瓌密招其黨朱實降之散其徒六  
七千人郢奔明州五年曹師雄寇湖州瓌遣兵擊破之

浙江

通志

周寶字上珪平州盧龍人藉廕爲千牛備身歷官金吾將  
軍進檢校工部尚書涇原節度使務耕力聚糧二十萬斛  
號良將黃巢據宣歙徙寶鎮海軍節度兼招討使僖宗入  
蜀加檢校司空時羣盜所在盤結寶練卒自守發杭州兵  
戍縣鎮判八都都各有主中和二年進中書門下平章事

封汝南郡王寶和裕喜接士以京師陷于賊將赴難益募兵號後樓都以子璵統之承制擢杭州都將錢鏐領州事高駢夙與寶善及爲都統不禮寶寶銜之帝在蜀淮南絕貢賦謾言道浙西爲寶剽阻帝知其誣不直駢駢出屯東堂約西定京師寶喜將赴之偵知將圖已不往二鎮好遂絕無何部將劉浩等叛寶出奔常州依丁從實錢鏐遣將圍常州從實奔海陵鏐具檄韃迎舍樟亭未幾殺之時年七十四贈太保

舊志

李棲筠字貞一世爲趙人舉進士代宗時平盧行軍司馬許杲恃功擅留上元有窺江吳意拜棲筠浙西都團練觀



察使圖之棲筠至張設武備遣辨士厚齎金幣抵杲軍賞勞使士歆愛奪其謀杲懼悉衆渡江又增學廬表宿儒河南褚沖吳何員等超拜學官爲之師身執經問義遠邇趨慕至徒數百人又奏部豪姓多徙貫京兆河南規脫徭科請量產出賦以杜姦謀詔可

唐書本傳

竇易直字宗元京兆始平人元和中爲浙西觀察使長慶二年江淮旱漕物淹積不能前部將王國清指漕貨激衆謀亂易直知之械國清送獄其黨數千羣譴入獄篡取之欲大剽易直登樓令曰能誅亂者一級賞千萬衆喜反縛爲亂者三百餘人易直悉斬之

唐書本傳

丁公著字平子蘇州吳人舉明經高第穆宗授浙西觀察使徙爲河南尹治以清靜聞長慶中浙中災厲拜觀察使詔賜米七萬斛使賑饑民

唐書本傳

李德裕字文饒趙郡人爲浙西觀察使儉于自奉留州所得盡以贍軍俗信巫祝惑鬼怪有父母兄弟厲疾者舉室棄之而去德裕擇鄉人之有識者諭之以言繩之以法弊風頓革屬郡祠廟按方志前代名臣賢后則祠之除淫祠一千一十所人樂其政敬宗卽位詔浙西造銀盃子粧具二十事進內又詔進可幅盤條繚綾一千匹德裕具論奏罷優詔報之德裕身居廉鎮傾心王室遣使獻丹旻箴宵

衣正服罷獻納誨辯邪防微六首帝手詔答焉太和八年

改鎮海軍節度蘇常杭潤觀察等使九年授太子賓客分

司明年復浙西觀察使凡三鎮浙西前後十餘年

舊唐書本傳

李景讓字後已贈太尉澄孫也方嚴有守會昌中自散騎

常侍出爲浙西觀察使事母鄭素孝謹旣受命偶失預告

母行期母怒景讓重請罪乃赦故雖老猶加箠敷已起訢

訢如初常以怒杖殺牙將母出廳事切責欲鞭其背一軍

乃安讓清素寡欲家無素儲

舊唐書志

汪華績溪人少以勇俠聞隋末兵亂以土豪應郡募保據郡境併有宣杭睦婺饒五州建號吳王至武德間籍土地

兵民納款高祖授以總管歙宣杭睦饒婺六州事歙州刺

史封越國公卒所在民祀之

舊志

柳楚賢虞鄉人貞觀中歷杭州刺史有名

唐書柳冲傳

裴倦中宗時以清德爲巡察使所薦遷杭州刺史爲政有

美譽

萬歷舊志

宋璟字廣平南和人神龍中歷杭州刺史在官清嚴人吏

莫有犯者

舊唐書本傳

袁仁敬開元中杭州刺史時元宗自擇諸司長官以仁敬

刺杭詔宰相諸王御史以上祖道洛濱賜詩親書以寵其

行仁敬治郡之暇嘗種九里松

浙江通志

劉晏字士安南華人天寶末拜度支郎中兼侍御史領江淮租庸事晏至吳郡會永王璘反採訪使李布言謀拒之假晏守餘杭會戰不利走依晏晏爲陳可守計發義兵堅壁璘聞晏有備遂自晉陵西走晏終不言功

舊志

李泌字長源居京兆天寶末拜銀青光祿大夫掌樞務出

爲杭州刺史以理稱

舊唐書本傳

泌徙杭州刺史有風績引西

湖水入城爲六井民利之

咸淳志

白居易字樂天其先太原人徙下邳貞元中擢進士爲杭州刺史始築堤捍錢塘湖鍾洩其水溉田千頃復浚李泌

六井民賴其汲會昌初以刑部尚書致仕

唐書本傳

崔涓性開敏爲杭州刺史受署未盡識卒史乃以紙各署  
姓名傳襟上過前一閱後數百人呼指無誤

唐書本傳

張擇字無擇登明經第補宏文館校書郎調杭州錄事參  
軍前後詰僞制補吏者三十八人駁假年侍老者二十八

舉而正之人服其明

白居易張擇神道碑

徐太元爲杭州叅軍其僚張惠以贓抵罪而惠母老乃詰  
獄自言與惠偕受薄其罪惠得不死

萬曆舊志

案舊志名宦有羅隱傳隱本新城人舊五代史亦作錢  
塘人吳越王錢鏐表爲錢塘令而爲令之政績不可攷  
舊志旣入文苑傳復載在名宦則一人兩傳矣今刪歸

文苑

郝硃貞觀初年任富陽令十二年開陽陂湖以蓄水兼造

水閘溉田萬頃惠利在民

浙江通志

李潛萬歲登封六年爲富陽令嘗築捍江隄自笕浦至東

觀山計三百餘丈以障水患民德之

萬歷舊志

顧昇庠開元十年任富陽令建縣市平易近民民親之如

父母

富陽縣志

崔士元爲富陽令在職以文風善政有稱永泰元年重建

學宮蓋爲政知所重者

浙江通志

鄭早貞元七年爲富陽令嘗增修陽陂湖

萬歷舊志

柳錫貞元十二年任富陽令開拓縣市

富陽縣志

董仲咸通八年爲富陽令讀書好禮建城隍祠

富陽縣志

趙訥咸通十四年爲富陽令嘗築城訥能文章知政體

浙江

通志

陳允升上元二年爲餘杭令有碑以頌德政

萬歷舊志

李復大歷四年復爲餘杭令有善政民立碑載其事

成化舊志

常師儒長慶二年爲餘杭令時縣有虎師儒爲文告神以

遣之

萬歷舊志

歸珽寶歷中爲餘杭令因陳渾故蹟置上下湖又開北湖

溉田千餘頃及築甬道通西北大路高廣徑直百餘里行



旅無山水之患人稱賢令珧作溪塘時洪水衝決功用勿  
成珧與神誓曰民遭水溺而不能救是珧之職也神矜民

亦何忍視其災隄由是就

浙江通志

丁表字元章麟德中爲於潛令有政績邑人爲立德政碑

咸淳志

杜詠貞元中爲於潛令嘗開紫溪河溉田又鑿渠以通舟

楫民蒙其利

浙江通志

五代

曹杲真定人仕後唐爲金華令時郡兵叛杲討平之吳越  
王嘉其功擢婺州守迨入朝委以國事嘗卽城隅浚湧金

池引湖水入城以通舟楫邦人德之立祠池上

萬曆舊志

聞人疑爲富春令重建縣治有興廢功

十國春秋

陸仁章爲富陽令性寬厚有果斷建通聖侯祠

富陽縣志

杭州府志卷七十四終

杭州府志卷七十五

名宦二

宋

王淵字幾道熙州人宣和五年劉延慶討方臘以淵爲先鋒賊據錢塘淵諭小校韓世忠曰賊謂我遠來必易我明日爾逆戰而僞遁我以強弩伏數百步外必可得志世忠如其言賊果追之伏弩卒發應弦而倒逐北至淳安賊據幫源峒遂圍而平之授閣門宣贊舍人康王卽位以淵爲制置使平杭賊提兵四出所向皆捷

宋史本傳

韓世忠字良臣延安人宣和二年方臘反世忠以偏將從

王淵討之次杭州賊奄至世忠以兵二千伏北關堰賊過  
伏處衆噪亂世忠追擊賊敗而遁窮追至睦州青溪峒挺  
身仗戈直前渡險數里擣其穴擒臘以出建炎二年陞定  
國軍承宣使三年苗傅劉正彥反世忠舉酒酌神曰誓不  
與此賊共戴天以所部發至秀州造雲梯置器械次臨平  
賊將苗翊馬柔吉負山阻河爲陣中流植鹿角梗行舟世  
忠舍舟力戰軍少却世忠復舍馬操戈而前賊列神臂弩  
持滿以待世忠瞋目大呼挺刃突前賊辟易矢不及發遂  
敗傅正彥開湧金門遁詔授武勝軍節度使御營佐軍都  
統制請于帝曰賊擁精兵距甌閩甚邇倘成巢窟卒未可

滅請討之于是以爲江浙制置使自衢信追擊至漁梁驛  
與賊遇世忠挺戈而前賊望見咋曰此韓將軍也皆驚潰  
擒正彥及傅弟翊送行在傅亡建康追擒之帝手書忠勇  
二字揭旗以賜授檢校少保武寧昭慶軍節度使諡忠武

宋史  
本傳

裴莊字端已閬中人景德初命安撫兩浙奏能吏二十人  
慢官者五人詔爲升黜之莊有吏幹忼慨敢言太宗獎其

忠讜多聽納焉

舊志

胡唐老字俊明舉進士靖康間以徽猷閣待制充兩浙宣  
撫司叅謀官知鎮江府兼浙西安撫使杜充降于金建康

失守潰卒戚方等趣鎮江城壁頽圯兵不滿千獨倚浙江制置韓世忠爲重世忠復去唐老度力不敵因撫之無何方欲犯臨安妄言赴行在請唐老部衆以行唐老不從諭以逆順禍福方衆環脅之唐老怒罵方遂遇害詔贈徽猷

閣直學士諡定愍

舊志

沈與求字必先德清人舉進士爲御史歷浙西安撫使上言和親乃金人屢試之策不足信也尋權知樞密院事見時多事不與之相聞遂乞祠出知明州

舊志

丁勝嘉熙間朝廷授以浙西總管淳熙初馬光祖爲畿憲會部內有臣寇許大四聚衆州縣大擾而憲司議勝勦捕

勝力辭行光祖誚其畏懼勝曰昔光武見大敵勇小敵怯  
今賊勢叵測而先遣總管萬一不利後使何人光祖始服

舊

志

李寶河北人金使蘇保衡由海道襲浙江乃授寶浙西路  
馬步軍副總管令督海舟捍禦屢立戰功詔獎諭書忠勇

李寶四字表其旗幟

宋史本傳

夏侯嶠字峻極鉅野人咸平元年浙江饑嶠自侍讀學士  
兼秘書監奉命爲江南巡撫使所過疏理刑訟存問耆老  
務從寬簡人以爲便使還採病民二十餘事上之亟詔釐

革晉判吏部選事

舊志

楊允恭漢州綿竹人少倜儻任俠太宗時以功轉洛苑副使江淮兩浙都大發運擘畫茶鹽捕賊事先是三路轉運使各領其職或廩庾多積軍士舟楫不給雖以官錢顧丁男挽舟而土人憚其役以是歲上供米不過三百萬允恭盡藉二路舟卒與所運物數令諸州擇牙吏悉集允恭乃辦數授之江浙所運止于淮泗由淮泗輸京師行之一歲上供者六百萬後又爲荆湖江浙都巡檢使允恭有膽幹

爲時能臣云

舊志

陳邁字亨伯其先自江寧徙永州登進士第歷官發運使宣和初浙寇作進龍圖閣直學士經制七路治于杭嘗言



妖賊陵暴州縣惟搜求官吏恣行殺戮備極慘毒不償怨  
心蓋貪污嗜利之人倚法侵牟不知藝極致有不平之氣  
結于民心一旦乘勢如此可爲悲痛臣願採摭官吏姦賊  
尚仍舊習者按治以聞許之因劾越州王仲蕤姦賊仲蕤  
坐黜杭經巨寇後河渠堙窒邦人以水潦爲病前守數請  
于朝朝皆以勞費輟後遵以冬月檄真揚潤楚諸郡凡守  
牘綱卒悉集治所先是當閉牘羣卒無以食率凍餓不自  
聊聞命相率呼舞以來者二千人用其力治河不兩月畢

杭人利焉

舊志

吳淵字道父寧國人景定間以知隆興鎮江二府兼都大

提舉浙西沿海諸州軍乍浦澉浦等處兵船歲大禋因淵全活者六十五萬餘人後再知平江兼浙西兩淮發運使歲亦大禋又全活四十二萬餘人除浙西提刑知太平州建康府拜資政殿學士

齊志

孫長卿字次公揚州人天禧中官浙江荆淮發運使歲漕米至八百萬或疑其多長卿曰吾非欲事羨贏以備饑歲爾轉兵部侍郎長卿長于政事爲能臣性廉潔不以一毫取諸人

宋史本傳

王鼎字鼎臣館陶人進士第提點兩浙刑獄累遷淮南兩浙荆湖制置發運副使前使者多漁市南物因奏計京師

持遺權貴鼎一無所市獨悉意精吏事事無大小必出于已凡調發綱吏度漕路遠近定先後爲成法于是勞逸均吏不能爲重輕官舟禁私載舟兵無以自給則盡盜官米爲姦有能居販自贍者市人持以法不肯償所運鼎爲移州縣督償之舟人有以自給不爲姦而所運米未嘗不足入爲三司鹽鐵副使鼎自奉儉約當官明敏強直不可撓

所薦士多知名

宋史本傳

盧秉字仲甫湖州德清人革之子少有雋譽中進士甲科累官兩浙發運副使東南饑詔損上供米價以糴秉言價雖賤貧者終艱得錢請但償糴本而以其餘賑贍是歲上

計神宗問曰聞滁和民捕蝗充食有諸對曰有之民饑死相枕藉帝惻然曰前此獨趙抃與朕言之耳先是發運使多進羨餘以希恩寵秉獨言賦安得羨今稱羨者率正數也請自是罷獻加集賢修撰後以守邊郡西討有功進爲

龍圖直學士

舊志

任中正字慶之曹州濟陰人舉進士真宗時擢兩浙轉運使民饑中正不俟詔發官廩以賑之累遷兵部尚書諡康

懿

東都事畧

段少連字希逸開封人爲杭州觀察判官累遷三司度支判官出爲兩浙轉運使往時使者所至郡縣索簿書不暇

殫閱往往委之胥吏胥吏持以爲貨少連命郡縣上簿書  
悉緘識週事間指取一二自閱摘其非是者按之餘不及  
閱者全緘識以還由是吏不能爲姦而州縣簿書莫敢不  
治矣部吏有過召詰曰聞子所爲若此有之乎有當告我  
我容汝自新苟以爲無吾不使善人被謗卽爲汝辨明矣  
吏不敢欺皆以實對少連每得其情諄諄戒飭使去後有  
能自改者保任之秀州獄死無罪人時少連在杭吏畏訊  
聚謀僞爲死者服罪疑未及綴屬少連已挈舟入城訊獄  
吏具服請罪以爲神明是時鄭向守杭無治才訟者不服  
往往自州出徑趨少連少連一言處決莫不盡其理少連

具通敏才當事決遣如流不爲權勢所屈及卒仁宗深惜

之舊

志

張夏字伯起雍邱人太宗朝進士景祐中出爲兩浙運使  
杭州江岸率多薪土潮水衝激不過三歲輒壞夏令作石  
堤一十二里以防江潮旣成杭民德之慶歷中立廟堤上

七修

類彙

孫甫字之翰許州陽翟人天聖進士歷兩浙轉運使范文  
正公守杭州以大臣或便宜行事甫曰范公貴臣也吾屈  
于此則不得伸于彼矣由是一切繩以法然退而未嘗不  
稱其賢也嘉祐元年遷河北轉運使

歐陽修孫甫墓誌

田瑜字忠資河南壽安人舉進士慶歷中爲兩浙轉運按察使杭州龍山堤歲決水冒民居輒賦芻塞之瑜與民約每芻十束更輸石一尺率五歲得石百萬爲石堤堤固而歲不調民仕至龍圖閣直學士

宋史  
本傳

孫瑜字叔禮博平人爲兩浙轉運使先是郡縣倉庾以斗斛大小爲姦瑜奏均其制黜吏之亡狀者民大喜有言其變新器非便下遷知曹州尋有言瑜所作量法均一誠便者乃還其元資累官工部侍郎

宋史  
本傳

方慎言興化人第咸平三年進士仁宗朝歷浙江轉運使錢塘江決數十里慎言親庀工授材疊石列大木以殺潮

勢賜璽書褒美

舊志

李復圭字審言徐州豐人歷兩浙轉運使浙民以給衙前  
役多破產復圭悉罷遣歸農令出錢助長召人承募民便  
之瀕海人賴蛤沙地以生豪家量受稅于官而占爲已有  
復圭奏蠲其稅分以與民熙寧初進直龍圖閣知慶州

宋史

本傳

沈立字立之歷陽人舉進士累遷兩浙轉運使時茶禁害  
民山場榷場多在部內歲抵罪者輒數萬而官僅得錢數  
萬立著茶法要覽乞行通商法如所請召爲戶部判官出  
爲江淮發運使知越州杭州

宋史本傳



毛漸字正仲江山人舉進士累官兩浙轉運使浙部水溢  
詔賜緡錢二百萬以賑之漸言數州被害卽捐二百萬儻  
仍歲如之將何以繼乃按錢氏有國時故事起長安堰至  
鹽官徹清水浦入于海開無錫蓮蓉河武進廟堂港常熟  
疏涇梅里入大江又開崑山七耳茜涇下張諸浦東北道  
吳江開大盈顧滙柘湖下金山小官浦以入海自是水不

爲患遷秘閣校理

舊志

常楙字長孺淳祐七年舉進士度宗時爲兩浙轉運使禁  
戢吏姦不以隱符督常賦鹽官歲爲鹹潮害稼楙請于朝  
捐金發粟復輟已帑大加修築新塘二千六百二十五丈

名曰海晏塘是秋風濤大作塘不浸者尺許民得奠居歲

復告稔邑人德之

舊志

陳堯佐字希元閬州閬中人舉進士爲兩浙轉運使錢塘江隄以竹籠石而潮齧之不數歲輒壞而復理堯佐議實薪土以易之或言其不可後隄久不成仍用薪土景祐四

年拜同中書平章事諡文惠

東都事畧

沈作賓字賓王吳興歸安人以父任入仕慶元間除兩浙轉運副使入對奏攢宮一司歲撥經總制錢爲緡率四萬有奇丹雘未蔽加之塗飾牆壁具存從而創易妄費固不足計無謂驚駭非所以妥神靈彰聖孝今後有合營緡聞

于朝下守臣稽覈畫旨而後興役上首肯再三除權工部

侍郎

舊志

王莖字子文吳人以父廕補官登第歷官兩浙轉運判官以察訪使出視江防自嘉興至行在增修官民兵船守險

備具

舊志

賈偉節開封人第進士累擢兩浙轉運判官明敏能悉民間利病加直秘閣爲江淮發運副使

舊志

趙叔近魏倬王五世孫爲兩浙提刑杭卒陳通反叔近招之通聽命叔近以數十人入城衆猶不解甲叔近置酒推誠待之遂皆感服城中稍定紹興九年贈集英殿修撰

宋史

本傳

陳楠字季任平陽人紹興間以直龍圖閣知泉州改浙西提刑乞置鄉縣三老以厚風俗凡宮室車馬衣服器械定爲差等重侈靡之禁官至廣東經畧安撫使

舊志

王珏字德全臨川人紹興二年起家鹽官丞秀州歲以錢給亭民煮鹽至十五年積十九萬七千餘緡不給民訴于朝除珏提舉浙西茶鹽逾年盡償亭民且贏鉅萬開華亭海河三百餘里鹽滋得流通且溢以溉田

洪武蘇州府志

經界法

行除其害者三百六十餘事其七千二百餘戶爲尤病珏

奏除之兼提點刑獄官至直敷文閣太傅少卿

舊兩浙誌

應孟明字仲實永康人光宗初遷浙西提刑孟明以儒學奮身受知人主韓侂胄嘗密遣客誘以諫官俾誣趙汝愚孟明不肯士論重之

舊志

劉燾字晦伯建陽人乾道進士浙西提點刑獄巡按不避寒暑多所平反有殺人而權家者吏不敢捕燾竟獲之遷國子司業言浙西根本之地宜詔長吏兼司禁戢強暴撫柔善良務儲積以備凶荒禁科歛以舒民力官至權工部

尚書諡文簡

宋史本傳

王居安字資道黃巖人舉進士立朝多所建白嘉定間以直龍圖閣提點浙西刑獄葛懌者用戚屬恩補官豪於貲

嘗憾父之嬖既去而誣以盜株連瘦死者數人憚未嘗一  
造庭居安一閱得實立捕繫論罪械送他州入對帝曰卿  
有用之才也歷官龍圖閣學士卒贈少保

舊志

陳塏字子爽嘉興人歷官浙西提點刑獄所至興學好士

以名義爲重軍民愛戴之

舊志

胡穎字叔獻潭州湘潭人紹定進士歷官浙西提點刑獄  
榮王府十二人行劫穎悉斬之一日輪對理宗曰聞卿好  
殺意在折獄穎曰臣不敢屈太祖之法以負陛下非嗜殺

也帝默然

宋史本傳

孫子秀字元實餘姚人開慶初爲浙西提舉常平徙浙西

提點刑獄多所平反擊貪舉廉風采凜然進大理少卿累遷湖南轉運副使辭復移浙西提刑冒暑周行八郡三十

九縣獄爲之清

舊志

包恢字宏父建昌人嘉定進士累除浙西提點刑獄時海寇爲亂恢單車就道調食漵浦分屯建砦一旦集諸軍討平之後以資政殿學士致仕恢破豪猾去姦吏治蠱獄課

益鹽理銀欠政聲赫然諡文肅

宋史本傳

陳塤字和仲鄞人歷官浙西提刑歲旱盜起捕斬之令官屬各以本司利害爲一書新任者具脚色申狀外不用啟其後馬光祖繼之亦有此例人皆趨之

舊志

唐震字景實餘姚人少卽介然不苟旣登第不阿權貴至以公廉稱咸淳初爲浙西提刑過闕陛辭似道以公田屬震震謝不能行至部又以疏力爭之賈氏有守阡僧甚暴橫震遣吏捕治似道以書營求震不省卒按以法似道怒使侍御史陳堅劾去之後知饒州元兵入府治執牘張案上使震署降震不屈投筆于地遂死之贈華文閣待制諡

忠介廟號褒忠

舊志

徐道隆字伯謙武康人爲浙西提刑權治安吉元兵迫臨

平道隆入援死之

舊志

顏師魯字幾聖漳州龍溪人紹興進士除浙東提舉尋改



使浙西役法敝甚遇輒破家師魯下教屬邑預正流水籍稽其役之序寬比限免代輸咸便安之鹽課歲百鉅萬本錢久不給亭竈私鬻禁不可止師魯撿帑緝盡償宿負戒官吏無侵移比旁路課獨最農民有墾曠土成田未及受租者奸豪多爲己利師魯奏但當正其租賦不應繩以盜種法失勸農重本意報可遂著爲令

宋史本傳

劉頴字公實西安人紹興間提舉浙西常平還澱山湖以泄吳淞江二水禁民侵築毋使逼塞大流民田頴之又奏備糴米廢園田二事不果行遷提刑以洗冤澤物爲任間

詣獄察不應繫者縱遣之

舊志

章服字德文永康人以詞賦登進士紹興末爲浙西提舉  
漕司嘗貸緡錢二萬至是已數年服立移督之而戶部復  
請貸三萬銜命小校耻不卽得出不遜語服叱之曰真聖  
旨耶常平民命也猶當以法奏覆汝何敢爾尋召爲吏部

員外郎兼皇子慶王府直講

舊志

孫峴字舉善以詞學擢第拜中書舍人淳熙初爲浙西提  
舉以措置支還亭戶本錢及增買鹽袋興修水利有勞除  
直敷文閣兩浙轉運使

浙江通志

羅點字春伯崇仁人淳熙進士由校書郎除浙西提舉規  
畫荒政凡數十奏躬行畝畝施惠甚溥點端介不爲矯激

之行或謂天下事非才不辦日皆論其心心苟不正才雖

過人果何取也歷簽書樞密院事諡文恭

浙江通志

徐誼字子宜一字宏父温州人乾道進士歷官提舉浙西  
常平論水利之切于時者百餘言寧宗朝知臨安府侂冑  
恃功以賞薄歛望誼告汝愚曰異時必爲國患宜飽其欲  
而遠之汝愚雅器誼除授建明多咨訪誼隨事禋助不避

形迹卒諡忠文

舊志

潘時字德鄜上虞人淳熙中爲浙西提舉至則罷中都饋  
餉之不如法者豪貴多不樂而平江庫錢失陷守誣富室  
以取償一郡大擾有致死者時檄罷之守怨時陰以禁兵

給白直而誅他司上其事時坐貶

舊志

侯叔獻字景仁宜黃人慶歷進士累官兩浙常平使者兼都水監建議置提舉淤田司相地利引水灌田四十萬頃

治水得性每詔獎諭

浙江通志

詹體仁字元善浦城人進士乙科光宗時提舉浙西常平體仁謂浙右之有漕渠非止通餽運資國信往來而已諸郡中田之高仰者實賴之于是開漕渠浚練湖置陡門爲旱澇備又以餘力立舉子倉創安濟院所活不可勝紀官

至司農卿

浙江通志

柳約字元禮華亭人大觀上舍進士靖康初以直龍圖閣

知台州徙嚴州兼浙西兵馬都監節制管內軍馬金人大  
入列郡震恐約屹保孤城悉力捍禦境內安堵上書請糾  
合諸郡克復吳會上嘉其忠詔以軍興費出無藝吏慢弗  
虔柳約獨謹賦輸率先程督進秩一等又詔約郡當兵衝  
而能不辭難不避事保綏一方以約充集英殿修撰擢權

戶部侍郎

浙江  
通志

王安節節度使堅之子也咸淳末爲東南第七副將德祐  
初似道潰師蕪湖列城皆降不降者亦棄城遁時安節駐  
兵江陵卽走臨安上疏乞募兵爲捍禦授閣門祗候浙西  
添差兵馬副都監收兵入平江合張世傑兵戰鳳凰港有

功轉三官後守常州元丞相巴延麾兵破其南門安節揮  
雙刀率死士巷戰呼曰我王堅子安節也降之不得乃殺

之舊  
志

范旻字貴參大名宗城人太平興國初錢俶獻地以旻權  
知兩浙諸州軍事旻上言似在國曰徭賦繁苛凡薪粒蔬  
果箕帚之屬悉收算欲盡釋不取以蠲其弊從之

浙江通志

翟守素濟州任城人太平興國三年錢俶獻浙右之地詔  
守素爲兩浙諸州兵馬都監安撫諸郡人心甚悅卽以知  
杭州守素性謹慎寬仁容衆凡斷大辟獄雖罪狀明白仍  
徧詢僚案僉同而後決屬吏有過不面折必因公宴援往

事之相類者言其獲咎以微警之

浙江通志

張去華字信臣襄邑人建隆初舉進士甲科真宗嗣位拜左諫議遷給事中知杭州兩浙自錢氏賦民丁錢有死而不免者去華建議除之景德元年改工部侍郎致事

宋史本傳

張詠字復之濮州鄆城人太平興國進士咸平二年以工部侍郎出知杭州屬歲歉民多私鬻鹽以自給捕獲犯者數百人詠悉寬其罰而遣之官屬請曰不痛繩之恐無以禁詠曰錢塋十萬家饑者八九苟不以鹽自活一旦蜂聚爲盜則爲患深俟秋成當仍舊法有民家子與姊婿訟家財婿言妻父臨終此子甫三歲故見命掌貲財且有遺書

令異日以十之三與子餘七與婿詠曰汝妻父智人也以子幼故托汝苟以七與子則子死汝手亟命以七給其子餘三給婿人皆服其明斷

宋史本傳

薛映字景陽家于蜀進士及第景德初以右諫議大夫知杭州映臨決鋒銳庭無留事轉運使姚鉉移屬州當直司毋得輒斷徒以上罪映即奏徒流笞杖自有科條苟情狀明白何必繫獄以累和氣請詔天下凡徒流罪于長吏前對辨無所異聽遣決之朝廷施用其言映爲治嚴明吏不能欺每五鼓冠帶黎明據案決事雖寒暑無異

宋史本傳

王濟字巨川饒陽人景德四年知杭州郡西有錢塘湖漑



田千餘頃歲久淤塞濟命工濬治增治陡門以備潰溢之患仍以白居易舊記刻石湖側民利之大中祥符三年徙知洪州兼江南西路安撫使屬歲旱躬督官吏爲糜粥全

活甚衆

宋史本傳

戚綸字仲言楚邱人大中祥符三年以樞密直學士戶部郎中知杭州給與轉運使陳堯佐言浙江潮壞岸漸逼州城望遣使自京師部埽匠濠寨赴州工役詔從之令馳驛而往命轉運使更互檢校遂以埽岸易柱石之制

咸淳志

馬亮字叔明廬州合肥人舉進士遷殿中侍御史真宗卽位知杭州先是江濤大溢調兵築堤而工未就詔問所以

捍江之策亮衷詔禱伍員祠下明日潮爲之却出橫沙數

里堤遂成

宋史本傳

俞獻卿字諫臣歙縣人以集賢院學士知杭州一日暴風  
江潮溢決堤勢不可禦獻卿鑿西山石作堤數十里民用

便之賜詔褒諭

咸淳志

李及字幼幾鄆州人進士以樞密直學士知杭州時內侍  
江德元居中用事其弟德明奉使過杭及待之薄僚佐曰  
江使者兄弟榮枯大臣如及反掌耳今不加禮待雖不求  
福獨不畏其爲禍乎及曰待之如是足矣旣而德明謂僚  
佐曰李公春秋高何不求聞郡以自處而居杭繁劇之地

耶僚佐走語及笑曰及老矣誠得閒郡以自處庸何傷既而德明亦不能傷也時人重其操守及資性清介治尚簡嚴喜慰薦下吏而樂道人之善忌杭風俗輕靡未嘗事宴游一日微雪遽出郊衆謂當命賓朋爲高會及獨造林逋清談至暮而歸在杭未嘗市物惟置白樂天一集而已

浙江

志通

司馬池字和中陝西夏縣人舉進士以天章閣待制知河中府徙杭州江鈞張從革爲兩浙轉運使惡池拮據其事條奏之降至虢州池未諳聞吏有盜官銀稱爲鈞償私費而從革之姻犯稅陰遣人私請或謂可以此報池獨不較

人以爲長者

浙江通志

張若谷字德繇沙縣人進士及第真宗擢知處州歷龍圖閣學士徙杭州會歲饑斥餘廩爲糜粥賑救之累官至尚書左丞所至有循良跡不激許取名

宋史本傳

蔣堂字希魯宜黃人擢進士第累遷左司郎中知杭州以樞密直學士知益州徙河中府又徙杭州以尚書禮部侍郎致仕卒爲人清修純飭遇事毅然不屈貧而樂施好學工文辭延譽晚進至老不倦

宋史本傳

鄭戩字天休吳縣人舉進士通判越州以資政殿學士知杭州錢塘湖溉民田數千頃錢氏置撩湖軍以疏淤填水

患既納國後不復治葑土堙塞爲豪族僧坊所佔冒湖水  
益狹戩發屬縣丁夫數萬闢之民賴其利事聞詔本郡歲  
治如戩法

宋史本傳

楊偕字次公大中祥符元年進士累官至工部侍郎嘗知  
杭州有能績爲人廉潔剛直少屈而難犯仁心愛物至其  
有所能容人多不及

歐陽修楊偕墓誌

方偕字齊占莆田人慶歷五年自淮南江浙荆湖制置發  
運使徙知杭州偕本以吏事進而杭訟牒素煩決遣無留  
事

咸淳志

范仲淹字希文蘇州人舉進士皇祐元年自鄧州移知杭

州加尚書禮部侍郎二年吳中大饑仲淹發粟及募民存  
餉爲術甚備吳人喜競渡日出宴湖上自春至夏居民空  
巷出遊又諭諸寺主首曰饑歲工價至賤可以大興土木  
之役于是諸寺工作鼎興又新厥倉吏舍日役千夫監司  
奏劾杭州不恤荒政嬉遊不節及公私興造傷耗民力仲  
淹乃自條敘所以宴遊興造皆欲發有餘之財以惠貧者  
貿易飲食工技服力之人仰食于公私者日無慮數萬人  
荒政之施莫此爲大是歲兩浙惟杭州宴然民不流徙

志

張方平字安道世家睢陽明道二年舉茂才異等科以校

書郎通判睦州後知杭州錢塘風俗輕侈貨利湊聚號煩劇難治方平下車訟庭肅然修救荒之政人無失所杭州地當衝會賓客留泊百姓積苦廚傳之擾方平命典庖晨一爨而已民以各安其業謂僚屬曰利害于人不繫細大歸于簡便此政術也大者畏之小者忽之何有民也郡城溝瀆自吳越納土未嘗疏浚渚濘穢濁人戶滌灌皆用之方平視江閘方潮退時高下甚遠因暑雨集舟百餘艘蕩諸穢水發閘瀉出之乘潮納新水溝瀆一清城中相慶凡諸施爲舉從便利錢塘人著之風謠至今誦詠

浙江通志

蘇頌字子容南安人父紳葬潤州丹陽因徙居之第進士

皇祐五年授秘書監知通進銀臺司吳越饑選知杭州一  
日出遇百餘人哀訴曰某以轉運司責逋市易緡錢夜囚  
晝繫雖死無以償頌曰吾釋汝使汝奉衣食之餘悉以償  
官期以歲月而足可乎皆謝不敢負果如期而足頌宴客  
有美堂或告將兵欲亂密使捕渠領十輩荷校付獄中迨  
夕會散坐客不知也

宋史  
本傳

李兌字子西臨潁人登進士第爲殿中侍御史仁宗擢天  
章閣待制知諫院出知杭州書安民二字以寵兌爲政簡  
嚴老益精明積官尚書右丞轉工部尚書致仕

宋史  
本傳

梅摯字公儀成都新繁人進士慶歷中擢殿中侍御史進



龍圖閣學士知杭州帝賜詩寵行累遷右諫議大夫摯性  
淳靜不爲矯勵之行政迹如其爲人平居未嘗問生業有  
奏疏四十篇

宋史本傳

王琪字君玉成都人治平元年以樞密直學士同判太常

寺知杭州政簡靜不游聲譽

萬歷舊志

蔡襄字君謨仙遊人治平二年以端明殿學士禮部侍郎

知杭州爲政精明吏不能欺

咸淳志

胡宿字武平其先豫章人後徙常州之晉陵舉進士中天

聖二年乙科遷湖州英宗卽位拜尚書吏部侍郎觀文殿

學士知杭州爲政不畧細故或謂大臣不宜自勞宿曰此

民事也吾不敢忽以是民尤愛之除太子少師致仕

歐陽修胡

宿墓

志

祖無擇字擇之上蔡人進士高第累官直集賢院出知袁

州歷杭州所至治行著聞無擇爲人好義以政事文章爲

時名卿與王安石不合放棄不振士論惜之

嘉靖浙  
江通志

鄭解字毅夫安陸人進士第一歷官知制誥神宗時召拜

翰林學士徙知杭州極言青苗之害引疾乞閒

嘉靖浙  
江通志

趙抃字閱道西安人熙寧三年罷叅知政事以資政殿大

學士知杭州抃和易長厚所至必興學校勸獎後進爲政

視其俗之厚薄與事多寡設施爲術不同杭多盜聞抃性

寬大細民多駢聚爲盜拏捕獲其情重者黥配他州盜遂遁去境內以清十年復自越州移知杭州言錢氏有故廟在錢塘頽圯荒蕪請選僧道主管歲度其徒一人從之朝旨欲修州城拏奏杭人新罹旱災乞罷役拏再守天下劇郡從容爲之其政本于豈弟不嚴而肅議者謂拏治民雖西京所稱循吏不能過也

萬歷舊志

陳襄字述古福州人熙寧中知杭州杭爲都會賓旅之衝朝廷使客相繼襄外應賓客內撫循人民州不知擾杭水鄉然皆斥鹵之地討其源流命工修復故井民遂獲濟

武林

紀事

楊繪字元素漢州人熙寧七年自應天府徙杭州元祐二  
年再知州事吏事敏給主于愛下雖胥史皂隸有過多容

之

萬歷  
舊志

沈起字興宗明州人熙寧七年自知潭州移知杭州爲人

寬和臨事明敏

萬歷  
舊志

蘇軾字子瞻眉山人嘉祐二年試禮部寘第二復以春秋  
對義居第一殿試中乙科復對制策入三等熙寧二年通  
判杭州高麗入貢使者發幣于官吏書稱甲子軾却之曰  
高麗于本朝稱臣而不稟正朔吾安敢受使者易書稱熙  
寧然後受之時新政日下軾每因法以便民民賴以安元

祐元年除翰林學士兼侍讀拜龍圖閣學士知杭州既至  
杭大旱饑役並作軾請于朝免本路上供米三之一復得  
賜度僧牒易米以救饑者又減價糶常平米多作餽粥藥  
劑遣使挾醫分坊治病活者甚衆杭本近海地泉鹹苦居  
民稀少唐刺史李泌始引西湖水作六井民足于水白居易  
易又浚西湖水入漕河自河入田所溉至千頃民以殷富  
湖水多葑自唐及錢氏歲輒浚治宋興廢之葑積爲田水  
無幾矣漕河失利取給江湖舟行市中潮又多淤三年一  
洶爲民大患六井亦幾于廢軾見茅山一河專受江湖鹽  
橋一河專受湖水遂浚二河以通漕復造堰牖以爲湖水

蓄洩之限江潮不復入市以餘力復完六井又取葑田積湖中南北徑三十里爲長堤以通行者且募人種菱湖中葑不復生收其利以備修湖取救荒餘錢萬緡糧萬石及請得百僧度牒以募役者堤成植芙蓉楊柳其上望之如畫圖杭人名爲蘇公堤浙江潮自海門東來勢如雷霆而浮山峙于江中與漁浦諸山大牙相錯洄洑激射歲敗公私船不可勝計軾議自浙江上流地名石門並山而東鑿爲漕河引浙江及谿谷諸水二十餘里以達于江又並山爲岸不能十里以達龍山大慈浦自浦北折抵小嶺鑿嶺六十五丈以達嶺東古河浚古河數里達于龍山漕河以

避浮山之險人以爲便奏聞有惡軾者力沮之功以故不成軾二十年間再泄杭有德于民家有畫像飲食必祝又作生祠以報六年召爲吏部尚書

宋史本傳

陳軒字元與建陽人紹聖靖國中兩知杭州有善政禱雨

獲應

浙江通志

曾孝蘊字處善晉江人歷官顯謨閣待制知杭州後坐累連削黜宣和二年復天章閣待制知歙州會移青州旣行而方臘陷歙道改杭州時賊已破杭孝蘊單車至城下城旣克復軍士多殺人孝蘊下令得自首無輒殺皆束手不敢驚論功進顯謨閣直學士又加龍圖閣學士

萬曆舊志

張閣字臺卿河陽人第進士以龍圖學士知杭州浙部  
和買絹杭獨居十三戶有數百匹者閣請均之他郡杭久闕  
守閣經理有敘去惡少年之爲人害者州以理聞召拜兵

部尚書

宋史本傳

李偃政和五年以徽猷閣待制知杭州嘗奏湯村巖門白  
石等處並邊錢塘江與大海通日受兩潮漸至侵齧乞依

六和寺岸用石砌壘詔從之後徙河南尹

浙江通志

徐鑄字元君年少入官有能名政和初提舉浙江常平越  
四年除轉運副使明年以徽猷閣待制知杭州及代以杭

人安其教令特除延慶殿學士

嘉靖浙江通志



鄭穀字致綱建州人知杭州高宗如杭穀奏曰陛下南渡  
出于倉卒省臺寺監百司之臣獲濟者鮮當擢吳中之秀  
以爲用况天下賢俊多避地吳越宜令守臣體訪境內寄  
居待闕及見任宮觀等京朝官以上各具姓名以聞拔簡  
任使庶幾得賢才以濟艱危詔從之

嘉靖浙  
江通志

劉誨建炎二年金人入杭守臣康允之棄城保赭山寺誨  
自楚州赴召在城中衆因推之以守城陷死之贈直龍圖

閣

咸淳  
志

李光字泰發上虞人以徽猷閣待制知臨安高宗欲移蹕  
臨安被旨節制臨安府見屯諸軍兼戶部侍郎督營繕事

光經營搏節不擾而辦奏蠲減二浙積負及九邑科配以

示施德自近之意

萬歷舊志

呂頤浩字元直齊州人紹興六年爲兩浙西路安撫制置大使兼知臨安府仍赴行在奏事訖之任時駐蹕平江頤

浩至臨安處事甚有緒豪右莫敢犯禁始置浙江監渡官

以舟大小定人數之多寡自是少風濤之厄

萬歷舊志

張澄紹興八年知臨安府時任同京邑澄有治劇之才請

浚治城中二河更不調夫興工惟兩浙諸州城北廂兵千

人赴役尋除戶部侍郎復再知郡浚臨安運河

浙江通志

趙子淵字清卿秦康惠王六世孫也紹興二十九年以兩

浙路轉運副使除直敷文閣權發遣府事談笑剖決吏不能欺國醫王繼先蒼頭怙勢干法子瀟移牒遣之繼先留其牒子瀟以聞其不憚權近如此勢家貨人子女爲僕妾抑令立契謂之義男義女與父母訣又禁之除戶部侍郎三十一年以敷文閣待制再知府事都城多圯請調三衙卒分策不擾而辨虜使來議和子瀟言交兵後事情叵測宜以軍禮待之一以示武二以崇儉三以自備孝宗嗣位有志恢復子瀟練本府兵習爲鵝鵠魚麗陳勢上觀于便殿慰勞嘉獎賜金帶

萬歷舊志

周必大字子充廬陵人紹興進士又中博學宏詞科歷官

觀文殿學士進少傅先是監臨安府和劑局失火延燒民居其發火之家皆繫獄必大日豈惜一官而不救人乎乃

自誣服衆遂得釋

嘉靖浙  
江通志

吳芾字明可仙居人紹興三十二年知臨安府內侍家僮

毆傷酒家保芾捕治之徇于市權豪側目

萬歷  
舊志

薛良朋隆興二年以兩浙轉運副使知臨安府警城盜賊

究心職事除直龍圖閣

成化  
舊志

周淙字彥廣長興人乾道三年以右朝請大夫直龍圖閣

兩浙轉運副使知臨安府上事卽請禁貴近奢靡五年二

月請置官卒專開撩西湖四月又奏渾水清水保安三關

已行修治今欲差官一員充監開官令管轄開兵依時啟  
閉不住打撩河道免致湮塞其監開官乞從本府大小官  
員內選辟詔可之宗在府嘗修臨安志十五卷

爲歷  
舊志

李椿字壽翁洛州永平人以父澤補迪功郎歷官至司農  
卿吏才精強人稱之孝宗擇臨安守椿在議中執政或謂  
其于人無委曲上曰正欲得如此人視事三月竟以權倖  
不便解去椿在朝敢言及是轉對又言君以剛健爲體虛  
中爲用臣以柔順爲體剛中爲用陛下得虛中之道能行  
剛健之德矣在廷之臣未見其能以剛中守柔順而事陛  
下者也以是執政滋不悅出知婺州後仕至敷文閣直學

士請老卒朱熹嘗銘其墓稱其逆知得失不假著龜不阿

主好不詭時譽

萬歷舊志

王佐字宣子山陰人以文魁天下而吏才極高壽皇深嘉之尹臨安日禁戢羣盜都城肅然既而以治罪增秩告命甫下置臥內旦起忽失之佐知爲所侮畧不見之辭色他日奏事畢從容以白上曰鼠輩惡臣窮其姦故爲是以沮臣爾上曰何以處之對曰臣若張皇物色正墮其計惟有置之不問異時從吏部求一公據足矣今未敢請也上稱

善

舊志

張杓字定叟廣漢人浚之子淳熙十一年以承議郎直徽

猷閣兩浙運副知臨安府神臯浩穰事叢俗雜杓撫良哉  
姦恩威並用兒歌于民六年以試戶部侍郎兼吏部侍郎  
除權兵部尚書再兼知府事風采更倍嘗訊內侍毛伯益

獄持法不稍假貸晉兵部尚書

萬歷舊志

袁韶字彥淳慶元府人嘉定十三年爲臨安府尹在位幾  
十年都民感其惠政呼爲佛子嘗作鄉賢祠于西湖之濱  
仍勒石贊之紹定初李全叛郡城洶洶韶自參知政事拜  
浙西制置使治臨安以鎮遏之丞相史彌遠懲韓侂胄用  
兵事不欲聲訶韶與范楷言于彌遠曰揚失守則京口不  
可保淮將如卞整崔福皆可用適福至韶夜與同見彌遠

言福實可用彌遠從之遂討全韶卒以言罷奉祠

舊志

顏頤仲字景正師魯孫以祖澤補官歷知嚴州時錢楮中半之令初行頤仲力爭不可朝廷不能奪遷兩浙轉運判官值禁旅饑諄語聞輦轂下頤仲撫定之除戶部郎知臨安府浙西安撫卒諄語如前頤仲曰曩撫諭從權弭變耳今事定宜討有罪以尊國體密諭主帥察其倡首者誅之

福建

通志

趙與權字化道燕懿王八世孫舉嘉定進士嘉熙中兩知臨安府兼浙西安撫使修治江堤振舉荒政具有成績事竣納祿去都人稱趙端明必以手加額曰趙佛子也

萬歷舊志



吳潛字毅夫寧國府人嘉定十年進士第一嘉熙四年以  
新除工部尚書兼吏部尚書知臨安府上論宜反身修德  
以求亨通之治遴選近族以繫人心而俟太子之生帝嘉  
納之兼侍讀經筵以臺臣論列罷知紹興府

萬歷舊志

蔡戡字定夫晉陵人紹熙四年以試司農卿兼知臨安

咸淳

志歲澇糴艱戡急請發倉民賴以濟

錢塘縣志

馬光祖字華父金華人舉進士調新喻主簿卽有能名寶  
祐三年以戶部侍郎知臨安府兼浙西安撫使乞嚴下海  
米禁并陳艱食和糴海道三害景定二年再以觀文殿大  
學士知府事兼安撫使會歲饑勸榮王發廩光祖之在方

州練兵豐財朝廷倚之爲京尹則剽浩穰風績凜然

萬歷舊志

李芾字叔章衡州人知臨安府賈似道當國前尹事無巨

細先關白始行芾獨無所問福王府有迫人死者似道力

爲營抹芾以書往復辨論竟真諸治嘗出闕火具民有不

爲具者問之日似道家人也立杖之似道大怒使臺臣黃

萬石誣以賊罪罷之似道敗始復官知潭州兼安撫使元

兵圖潭芾闔門死之贈端明殿大學士諡忠節

舊志

陳文龍字君蕢莆田人俊卿五世從孫咸淳四年廷對第

一賈似道愛其文禮重之由鎮東節度判官歷監察御史

先是臺中有建白皆呈稿似道文龍獨否似道不悅出知

臨安府襄陽圍急似道陽請督師無行意而陰使其黨留  
已襄陽遂陷文龍疏論其罪後充閩廣宣撫大使以不降  
元餓死計開謚忠肅建廟號昭忠

福建  
通志

余良肱字康臣分寧人第進士通判杭州江湖善溢漂官  
民廬舍良肱壘石堤二十里障之潮不爲害時王陶爲屬  
官常以氣犯府帥吏或訴陶帥挾憾欲按之良肱不可曰  
使陶以罪去是以直不容也帥遂已後陶官于朝果以直

聞

宋史  
本傳

楊蟠字公濟章安人也舉進士爲密和二州推官歐陽修  
稱其詩蘇軾知杭州蟠通判州事與軾倡酬居多平生爲

詩數千篇後知壽州卒

宋史本傳

按舊志列蟠文苑以爲貫杭州今考正史無貫杭事且

旣列名宦則後無容重出矣餘已詳選舉卷

張確字子固宜祿人元祐中擢進士第宣和中清溪盜起確請下哀痛之詔省不急之務租賦之外一切寢罷敢以花石淫巧供上者死撫綏脅附毋以多殺爲功忤王黼意判杭州攝睦州事有自賊中逃歸者悉宥之訪得虛實以告諸將用其言盜平後知隆德府以不降金死節贈述古

殿學士

萬歷舊志

章誼字宜臬浦城人崇寧進士授杭州通判建炎初陳通

寇錢塘城閉部使者檄宜聚杭州七縣弓兵以張聲勢會王淵討賊誼隨淵得入城賊平旋加撫定人皆惠之遷二

陟擢倉部員外郎

宋史本傳

顏耆仲字景英師魯孫歷倅臨安府登寶慶二年進士生平雅愛士類置平湖柱莊以歲入錢贖計偕士官至中奉

大夫爵龍溪縣開國男

福建通志

李陟字元昇少以進士舉太學淳化中知秀州嘉興縣浙江堤壞不可治詔江淮荆浙發運使舉可用者以陟通判杭州堤成度用財力甚省而完且可久當時以爲材召除

御史未及而卒

王安石李陟神道碑

孫奕字景山閩縣人皇祐元年進士歷監察御史論新法不便爲鄧綰所劾出監陳州酒稅陳襄知杭州辟僉判襄在經筵復言奕事行著于鄉閭節義信于朋友歷官所至以善政聞可謂循吏宜使當一路以厚俗安民元祐初除

福建轉運使

福建通志

胥致堯世爲燕人徙家合肥端拱咸平間再舉進士監溫州天富鹽監治鹽三歲增其舊二百餘萬斛監杭州排岸司浚浙江龍山二閘廢河堰以通漕杭人便之

歐陽修胥致堯墓誌

張君房字允方安陸人爲錢塘令撰潮說三篇

錢塘縣志

鞏庭均爲錢塘令嘗撰錢塘湖山遊覽記

錢塘縣志

周濤字幾道海陵人慶歷六年進士知錢塘縣爲政壹自  
急飭視民疾如在己不肯釋事實爲名聲要利所在民愛  
譽甚于士大夫治平三年授簽書梓州判官

王安石周濤墓誌

方懋德字元相宣和三年起家胄監授鄂州刑曹改武康  
尉後遷錢塘令府牒索磚五十萬懋德持不可立庭下屹  
不去卒罷之

浙江通志

李迎字彥將河陽濟源人欽宗時以恩補將仕郎後知錢  
塘縣歲旱留運河水溉民田會全國使至漕臣諭迎撤壩  
通舟迎因請留其曹怒捃撫無所得至用前政陳炳事劾

迎坐是罷起知婺州金華縣

周必大李迎墓表

朱蹕湖州人爲錢塘令建炎三年完顏宗弼入臨安蹕領士卒往前路款敵使杭民爲逃計行二十里遇賊蹕中兩流矢傷甚猶叱左右負已擊賊城陷蹕在天竺山遇害

萬歷

舊志

吳革江州人淳祐中爲錢塘令南渡以來錢塘地多爲王宮公府而稅賦尚存民以爲病革爲奏免尋通判臨安府

嘉靖浙

江通志

沈菊山失其名字宜春人由進士知錢塘嘗植菊數百本以自樂晚節益堅適以九月九日沒朱文公輓之以詩云愛菊平生不愛錢此君原是菊花僊正當地下修文日恰



直人問落帽天生與唐詩同一派死隨陶令葬千年如今

忍向西郊哭東野無兒更可憐

舊志

鞠詠字詠之開封人淳化間爲仁和令有聲績郡守王化

基入朝首以詠薦

嘉靖仁  
和縣志

按舊志云宋史列傳詠舉進士試秘書省校書郎知錢塘改著作郎知山陰縣官至戶部副郎無令仁和事今考宋史鞠詠傳亦無郡守王化基入朝薦詠事不知嘉靖志所據何書仍錄之以俟考

梅詢字克臣爲仁和令有詩名嘗作武林山十詠詩刻石

于冷泉亭上

成化  
舊志

按舊縣志云宋史列傳梅詢字昌言宣州宣城人進士第爲利豐監判官後以秘書省著作佐郎御史臺推勘官預考進士崇正殿真宗過殿廬奇其專對詳敏試中書除集賢院後至貴顯並不載其令仁和今考宋史詢傳固如縣志所錄但傳內載詢通判杭州則詢爲杭州時咏詩刻石或亦有之第不知舊志何據且言爲仁和令也仍錄之以俟考

關魯天聖明道間爲仁和令府志云進士起家歷守池太二州爲尚書郎年八十歸老錢塘陳襄作鴻飛詩以送之

仁和  
縣志

孫錫字昌齡真州人天聖進士知杭州仁和縣籍取克惡  
戒以不改必窮極案治而治其餘一以仁恕縣人畏愛之

官至尚書度支郎中

王安石孫  
錫墓誌

孫廷直紹興三年爲仁和令嘗徙縣治于招賢坊

舊志

莫漳湖州人爲吳望族宋淳熙初知仁和縣有出入德壽  
宮者恃中人勢凌蔑良善屢進不出漳衣綠袍候于宮門  
外俟其出擒而撻之高宗怒命降漳一官未幾復治一人  
再降一秩仍在任數月間平江缺守宰執進擬孝宗曰朕  
有其人遂除漳院轄以承議郎知府事

舊志

陳鞏與義之孫也淳熙十一年爲仁和令以能稱作無倦

堂倪思爲之記

萬歷舊志

趙希言字若訥惠王令應元孫淳熙十四年登第調衢州司戶用薦授臨安府司法知臨安仁和縣闢學宮四百餘畝適大旱蝗集御前蘆場中亘數百里希言欲去蘆以除害中使沮其策希言驅卒燔之臨平塘隄決希言督役親捧土投石兵民爭奮隄成又築重隄後不復決民病和買絹折錢重希言節公費代其輸累遷秘書丞著作郎卒贈資政殿大學士封越國公

宋史本傳

胡巨卿紹定五年爲仁和令平易近民政多可紀在郡令

中以最聞嘗捐錢新縣治喬行簡爲之記

舊志

趙公預字仲謙常熟人進士爲仁和令居官廉正常言吾求爲循吏不求爲健吏仕至寶謨閣待制

浙江通志

伍祐字佑之正己曾孫寧化人大中祥符元年進士歷知

宣城海日二邑以廉能稱

福建通志

朱公綽景祐四年爲鹽官令有惠政蘇夢齡撰記畧云公

綽自校秘書陟涖茲土勤宣惠澤究察民瘼建鹽法損菱

輸省茶稅清田畛茲更葺縣署因擇其尤善者紀之

浙江通志

歐陽珣字令美廬陵人舉進士爲鹽官令有惠政以薦名

入官京師靖康初議割三鎮以和金珣力爭不可忤時相

命使于金爭益力遂見殺

海寧縣志

王昞字子華華陽人政和七年令鹽官鹽官濱海號稱難  
治期年吏畏民安詞息鹽饒政有條理其除弊革故不勞  
而成蓋吏之以敏幹著者

浙江  
通志

刁廡丹陽人紹興五年爲鹽官令學宮毀廢廡重建焉胡  
理記曰廡治尚簡靖察姦不苛訟獄衰息皆實事也

浙江  
通志

胡斌字與立無爲人紹興八年任鹽官令崇寧後縣令題  
名未備斌輯爲一編以續圖經張九成記之其言曰胡君  
與立以學行承天子命來幸是邑下車之明日出條教告  
吏若民行之期年百廢具舉頌聲載塗刺史文章論薦邑  
中士君子交袂相賀喜斯道之復見也其推重如此

海寧  
州新

志

吳由淳熙間任鹽官令嘗與邑人楊均重輯圖經作先賢錄表章晉唐以來諸名賢之產于寧者其祭許太守文畧云由幼讀書而知有睢陽太守之烈茲試令而獲武原忠義之鄉私竊自幸云云讀其文知非俗吏

海寧州新志

談鑰吳興人淳熙間任鹽官蜀山場催煎官鹽嘗輯催煎其地者十有八人勒諸石自爲記

海寧州新志

陳恕會稽人淳熙十六年令鹽官重修學宮及鐘鼓樓築二十五里塘至今稱爲甘棠堤云

舊志

魯竛秀州人紹熙三年宰鹽官適遇水旱告饑者二十餘

萬人竝請于府上聞得太倉粟二萬斛賑之越明年春疫復藥石而體粥之全活甚衆八月秩滿將趨裝又念向之死于疫者不能葬收餘骸作三叢塚瘞焉仍鐫死者姓名于石其費皆取于公不以勞民在治三年庭下肅然胥吏不敢欺容嘗叩公何以致此則曰吾唯臨之以至誠待之以不倦爲政三年祇如始至之口耳

葉延年叢塚碑記

王墀山陰人紹熙慶元間任鹽官買納鹽監其所轄上管下管蜀山巖門凡八場歲額以石計者十三萬九千有奇墀游刃有餘而以其暇寄情翰墨嘗彙本監前事之人自

爲題名記勒之石

海寧州新志



潘景夔括蒼人開禧二年任鹽官令慈祥臨民儒雅飾吏政成暇日撫臨安志全書增考故牒與邑士互訂之自胡

旣續圖經後景夔又爲之續云

海寧州新志

張琥字子嚴崇德人嘉定進士授於潛尉有聲繼宰鹽官

仁和寬平簡易以教養爲先所至多惠政

海寧州新志

趙汝船紹定元年爲鹽官令下車卽率同僚拜張九成墓重建墓亭又過淨居院剝无垢祠堂香火寺僧源上人藏无垢簡帖十餘紙卽命工刊之旣而故家皆出所藏以獻悉刻之司業于有成記云无垢先生止有孫勛重孫克仁饑困窮乏乃值邑宰撫存而禮遇之士大夫知所貴重

如趙君天下能有幾人哉

海寧州新志

劉誠之大梁人登進士仕鹽官令以恩撫笈以威肅姦剽磨弊病修舉廢缺有一未及歉然于中世美良吏焉

海寧州新志

志

按海寧州新志云據金志題名記畧知誠之亦良吏然考前後縣令題名在崇寧前有劉宗吉劉舜卿劉洪崇寧後有劉偉劉開仕最後則有劉繹獨無誠之名得非諸劉中有以字行者耶錄以俟考

孫邁建隆中除大理寺丞知富陽縣沉厚有謀能斷大事

富陽

縣志

周仁邈乾德五年知富陽縣勤于政事重建縣治

富陽縣志

王永徽開寶四年知富陽縣性勤慎建榮國寺

富陽縣志

邱荷康定元年朝奉郎守太子中允知富陽縣尚名節扶

植善類立郭侯廟碑

富陽縣志

何去非紹聖四年宣議郎知富陽縣以清儉臨民修普照

寺塔

富陽縣志

吳怙爲富陽令勤敏有惠政崇寧元年加奉議郎賜緋魚

袋

舊志

毛注字聖可衢州西安人舉進士知南陵高苑富陽三縣皆以治辨稱大觀中御史中丞吳執中薦爲御史詔賜對

未及而執中罷注辭焉徽宗固命之既見謂曰今士大夫

方寡廉鮮恥而卿獨知義命故特召卿卽以爲主客員外

郎俄擢殿中侍御史

宋史本傳

胡紉宣和元年知富陽縣政治有方四野樂業建秦望樓

四年築縣城

富陽縣志

楊尚友字令德建州人宣和中知富陽不尚苛察民樂其

政

富陽縣志

劉舉夔宣和末知富陽縣會當方臘殘掠之後鼎新邑治

百廢具舉

富陽縣志

趙誦之字晉仲紹興間以玉牒朝奉郎知富陽縣練達政

務一時有能名

富陽縣志

萬直夫字和仲饒州人紹興間知富陽治有時譽

富陽縣志

陸康民東越人爲富陽令禁遊惰勸農桑

舊志

徐端輔紹興十五年知富陽縣修學校置學田建稽古閣

邑士爲之振起

富陽縣志

章才邵字希仲建安人乾道初知富陽縣以文章政事顯

富陽縣志

陸楠字國材長樂人乾道中知富陽縣善詩文修舉廢墜

四年間闢湖真山路作石關記縣題名牌

富陽縣志

糜師且蘇州人淳熙中知富陽縣能文章知政體

富陽縣志

沈栢字濟之吳興人淳熙中知富陽縣勤于政事尤善吟

咏

富陽縣志

陳嘉猷慶元五年知富陽縣能文章有舉廢之功建擁青

亭

富陽縣志

范之柔蘇州人慶元中知富陽縣督勵諸生躬行課試三年不倦士擢第者皆出其講席下一時稱儒吏云

浙江通志

樓瀟四明人爲富陽令有惠政

萬歷舊志

呂昭亮嘉定初知富陽縣邑歲被行都掾買石板之役數以千計甚苦其擾前令樓瀟欲爲民蠲之而未暇昭亮先托所知叅政路君備陳利病于宰執前已而率民投牒都

堂卽獲除免慮久或湮泯勒漕臺帥府所頒二帖于石

通志

陳秘新安人知富陽縣慈惠恤民修廣學校嘗重甃湖鼻

山石闌以便民往來美績茂著

萬曆舊志

曾治鳳字君輝清源人嘉定間爲富陽令修湖鼻山夾道石闌爲義役法又請秋苗折價民皆德之嘗有瑞麥產于

境

浙江通志

李彌高永嘉人嘉定中知富陽縣增修學宮建春江書院

于廳事東偏以講道藝政成民悅程秘爲之記

富陽縣志

趙汝崖本宗室天台人景定四年知富陽縣清儉自持重

建縣獄及迎秀逸雲澄江三亭

富陽縣志

章得景德中爲餘杭令建學崇儒教化大行

成化舊志

按萬歷舊志作章得一未知孰是

柳永字耆卿仁宗景祐間餘杭令長于詞賦爲人風雅不羈而撫民清靜安于無事百姓愛之建玩江樓于溪南公

餘嘯咏有潘懷縣風

餘杭縣志

楊時字中立將樂人熙寧進士知餘杭有惠政民思之不忘時安于州縣未嘗求聞達而德望日重四方之士不遠

千里從之號曰龜山先生

宋史本傳

江表宣和間爲餘杭令有永利記其精父老相傳褒掘地



決獄政稱神明蓋當時賈人瘞券以誣寺僧得其情也又黃頡黃中亦賢令之尤者二黃相繼中面黑頡面白邑人以黑白別之

浙江通志

張元嗣建炎三年餘杭縣令修縣治建學舍文教賴之

舊志

范仲將紹興五年令餘杭以舊學湫溢易地重建士人頌之

萬歷舊志

周章紹熙慶元間爲餘杭令有政蹟嘗修築溪湖塘岸以防水患民得安民爲立祠香泉坊祀之又祠名宦

餘杭縣志

按省志所載周章係紹熙慶元間爲餘杭令縣志作紹興五年誤今訂正

趙師恕嘉定八年爲餘杭令因雨澤愆期地多荒白上書于朝請勸民雜種麻粟豆麥之屬以備歲儉謂專種稻一遇水旱則一年之望絕矣雜種先後參差此失則彼得多  
少亦足以救目前急朝命從之

餘杭縣志

呂午字伯可歙縣人嘉定四年進士歷官以操守稱知餘杭縣時以言罷公論大不平然自此名益重又有毛球不知何許人故老皆云賢令其傳誦必有自矣

萬歷舊志

趙希磐宋公族也紹定間令餘杭時年方壯而識幹老成政號清靜嘗新縣治不勞民而成洪咨夔爲記

萬歷舊志

陳師錫字伯修建陽人令臨安有善政蘇軾薦于朝改宣

義郎

浙江通志

鞏豐從呂祖謙遊淳熙辛丑以太學生對策高第教授漢陽後知臨安政尚寬簡吏民信化刑罰衰息尋以祠祿罷

舊志

孫洙字巨源廣陵人仁宗時爲於潛令歐陽修包拯吳奎

三人合辭交舉洙應賢良方正科遷編校秘書閣載籍

咸亨志

志

按萬歷舊志云洙令於潛政績無考而能爲一時名賢合辭交薦則洙之仕學並優可想見矣

李紘字仲綱進士及第試秘書省校書郎知於潛縣有惠

愛歷天章閣待制進龍圖閣直學士

宋史李昌齡傳

刁璿字景純熙寧中爲於潛令蘇軾倅杭行縣爲賦野翁亭詩有我來觀政問風謠皆云犬吠足生豎之句後與蘇

軾毛國華並祠于浮江之上

成化舊志

崔道元豐間爲於潛令有遺愛嘗興元豐塘爲邑人利至

今呼崔長官塘

咸淳志

毛寶字國華令於潛值歲旱蝗寶勤于捕蝗梅聖俞至其邑作詩贈之曰宦遊逢此歲年惡飛蝗來時蔽天黑羨君

禾稻熟如雲蝗自識人人不識

嘉靖浙江通志

趙峴三衢西安人清獻公抃之子也元祐初爲於潛令在

任九年專以興學勸農爲務卒于官卜葬縣北清山之麓  
次子電廬墓因家焉百姓致甘棠之思名其山曰棠公山

舊志

韓璣字德全相州人琦之孫政和初爲於潛令興利除弊  
因山水之秀卜吉改廳事南嚮自餘倉庾庠序暨諸公所  
皆因其舊而增新之獨令之寢舍無根椽片瓦易之示不

私于自奉也

萬歷舊志

何价紹興間爲於潛令重修學校勉勵後進縉紳之士翕

然稱之

萬歷舊志

葉衡字夢陽金華人隆興間令於潛時邑中戶版積弊富

民多遺漏貧弱苦于賠輸銜定爲九等自五以下除其籍  
而均其額于上之四等貧者顛蘇催征列爲限期榜縣門  
俾里正諭民不遺一胥而賦自足歲災蝗不入境吏治爲  
諸邑最民立祠祀之

舊志

邵文炳紹興間爲於潛令大興水利又減山鄉折米之直  
民懷其德政與葉衡同祠縣南號二賢祠

成化舊志

趙彥俊字安卿叔駁之曾孫也知臨安於潛縣縣胥往往  
通臺吏以肆其姦彥俊執其黠者械送府臺臺吏從中救  
之彥俊力爭竟抵胥罪境中浮橋屢爲水敗彥俊梁以石

民免溺死遷臨安府通判

萬歷舊志

胡衛字嘉泰餘姚人爲於潛令興學勸農置郵立堠甚有政績其後王日益爲令有惠政嘗言能使民安其生物得其所斯無愧矣

成化舊志

呂沈字叔朝歙人以銓試第一知於潛縣有惠政逸囚聞沈至自來歸罪判婺州忤賈似道謂將作監簿歸不復出

卒年八十一

江南人物志

徐評爲新城令嘗建歲寒橋以濟涉者

舊志

晁端友字君誠鉅野人熙寧中爲新城令有善政蘇軾序

其詩謂清厚靜深如其爲人

成化舊志

許仲蔚字子均爲新城令以文學名

成化舊志

仲蔚少博學有

志用世嘗條時務請建義倉置營田行鄉飲藉田復制科  
興學校仁宗嘉之擢令新城能以素所自許者推行之政  
平民又有卓茂之名時蘇軾守杭知仲蔚尤禮重之

新城縣志

耿秉江陰人乾道中爲新城令勵廉隅勤政事興學校和  
民人省繁役蠲重賦爲一時循吏冠邑人爲立生祠仕至

侍郎

舊浙江通志

陳收端平間令新城時民困於茶租錢收爲疏請特與蠲  
二千八百貫不强其所無以困民力

浙江通志

謝夢生永嘉人端平初令新城莅政有方科差不擾民樂

趨事成頌其賢

舊志



陳君寶閩縣人以儒術令新城邑之陋習盡革建立譙樓

未嘗勞民

舊志

錢冰宣和中爲昌化令有政績重建縣治置雙溪館

成化舊志

劉士修紹熙中爲昌化令嘗開灣水潭石路以便民往來

邑人賴之

萬歷舊志

卞園泰州人乾道中爲昌化令邑中百廢具舉

萬歷舊志

錢孜嘉禾人淳熙四年知昌化縣事以興舉學校爲急自

是彬彬多文盛科第孜之功也

舊志

周堪紹熙慶元間爲昌化令鑿義井建慈濟院以便行者

浙江

通志

章伯奮永嘉人嘉泰開禧間任昌化縣有殊政勸養濟院  
置田五十畝聞境內虎患禱于神虎渡水去民建渡虎坊

以彰異焉

舊志

趙希暨紹定中爲昌化令仁厚愛民時有徵楮漆于民希  
賢爲劄論之極言邑民生理之薄遂罷徵仕至端明殿學

士

成化舊志

葉采建安人淳祐中爲昌化令嘗師李方子得朱子之傳

在官解近思錄因刻于學宮以廣其傳

萬歷舊志

帥寶字仲珍濠州人咸淳中授鹽官丞著開清廉擢昌化

令勸農課士聽訟咸得其情後卒于官留葬焉

浙江通志

王綸字德言建康人紹興五年進士歷臨安府教授權國子正時初建太學亡舊規憑吏省記吏緣爲姦綸釐正之樊稍革遷敕令所刪定官兼權兵部郎官言孔門弟子與後世諸儒有功斯文者皆得從祀先聖令闕庠序修禮樂宜以其式頒諸郡縣爲監察御史與秦檜論事忤其意罷知興國軍檜死名爲起居舍人終資政大學士卒諡章敏

宋史

本傳

施師點字聖與上饒人乾道元年爲臨安府教授用陳康伯薦賜對言歷年屢下詔恤民而惠未加浹陛下軫念惟恐一夫失所郡邑搜求唯恐財賦不集毋惑乎日降絲綸

思不霑被細民既困于倍輸又困于非法重以歲惡室且垂罄租不如期積多逋負今明堂肆赦戶自四等以下逋自四年以前願悉除免上曰非卿不聞此言詔從之

歷代名臣

奏議

按舊志宋教職有戴表元傳元史儒學傳表元登進士乙科教授建寧府後遷臨安教授行戶部掌故皆不就  
是表元未莅任也今不載

李祥字元德無錫人隆興進士爲錢塘縣主簿時姚憲尹臨安俾攝錄參邏者以巧發爲能每事下有司必監視銀鍊囚服乃已嘗誣告一武臣子謗朝政鞠于獄祥不使邏

者入門旣而所告無實尹驚曰上命無實乎祥曰卽坐譴  
自甘憲具論如祥意上曰朕幾誤矣卿吾爭臣也歷遷國  
子司業宗正少卿以直龍圖閣致仕諡肅簡

宋史本傳

芮華初任仁和尉長河堰有龍王廟每祭則有小蛇出往  
來者謹事之堰歲數壞人以爲龍所爲華疲于修築一日  
設奠蛇果出華端笏數之曰有功于民者乃得祀龍廟食  
于此未嘗有功而歲數壞堰勞民之力爲罪多矣法當殺  
卽舉笏斬之應手碎是夕宿近地疾雷甚雨林木盡拔土  
人大懼而華處之自若

舊志

陳桂淳祐間監鹽官縣南路等場廉勤有吏幹躬課督亭

民咸奮歸業歲額日增浚河作倉咸于場便益應縣記之

萬歷

舊志

黃珪字元功侯官人政和中辟鹽官縣丞時經方臘亂後給復三年并停鹽法後復舉行值歲饑帥府以之屬珪珪曰急疲民以悅上官我何能爲于是盡呼邑之父老諭之曰有司持此以供公上吾將寬若程督免若追胥若曹亦樂輸耶咸感泣踰月而辦秩滿屢薦除大理寺卿紹興中擢監察御史遷吏部郎

海寧縣志

趙時栗仙居人宋末爲鹽官主簿死元人之難

海寧州新志

楊簡字敬仲慈谿人乾道五年進士任富陽主簿會陸九

淵過富陽問答有契遂師事之邑民多服賈不知學簡與  
學養士文治遂振學者號燕湖先生祀名宦祠

舊志

葉延年吳興人淳熙十二年任富陽主簿善詩文修儒學

置書籍撰題名碑記

舊志

徐自明淳熙間任富陽主簿能詩文立小學留意訓迪應

舉得人

舊志

林湜字正甫福寧人紹興三十年進士調富陽尉嘗部勒  
弓手擒鹽徒之行劫者改知晉江判南劍州除湖北轉運  
副使直龍圖閣致仕朱子被斥士皆違嫌湜獨執弟子禮  
不變未歿前數月猶馳書問疑義卒年七十一著樂隱集

福建  
通志

成無玷武康人由進士宣和間任餘杭縣丞因邑令江袤  
修築南湖乃作水利記五畝塋銘刻石鳳凰山宰相李綱

嘗薦其文武才畧名對除剛定官

餘杭  
縣志

吳元字陽初會稽人開慶初爲餘杭縣丞明辨有折獄才  
民有沈德天者昆弟姪三人爲人誣抵死獄辭將成矣元  
讞其寃出之前此邑中旱五月不雨至是一雨節度觀察  
使交章薦之元疾賈似道權奸憤恚而卒民思其德留葬  
餘杭而募田以供祭祀子孫遂家焉

餘杭  
縣志

李彥穎字秀叔德清人紹興十八年擢進士第主餘杭簿



守曹泳豪放酒家業爲官鹽利其貲具彥穎爭之泳怒誠

吏伺察之不得毫髮罪調建德丞

舊志

孔文仲字經父新喻人舉進士擢第一調餘杭尉恬介自守不事請謁轉運使在杭召與議事事已馳歸不詣府人

問之曰吾于府無事也再轉台州推官元祐初召爲秘書

省校書郎遷中書

宋史本傳

婁機字彥發嘉興人孝宗乾道二年進士仕鹽官尉七攝

鄰邑篆已調於潛丞俱有治績

舊志

張國均汧江人開禧初爲於潛縣丞舊記稱其爲江右著族夔學業溫良之風不待卽之知其爲君子也蓋亦邑倅

之賢者

萬歷舊志

趙師倬浚儀人嘉泰間爲於潛丞有幹濟才專以簡靜爲

治

舊志

邱來蘇州人開禧中爲於潛簿甚得佐令之體嘗建景覽

堂

舊志

曹涇字清甫新安人由進士爲昌化邑簿德祐間以文學

名

昌化縣志

陳錫爲昌化主簿有文學嘗爲擒虎行曲盡憂民之意

萬歷

舊志

杭州府志卷七十五終